



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADONAČELNIK

Izvještaj
o aktivnostima Grada Sarajeva
u oblasti međunarodne saradnje u 2020. godini

Predlagač: Gradonačelnik
Obrađivač: Stručna služba
gradonačelnika Grada Sarajeva

Sarajevo, februar 2021. godine

Adresa: Hamdije Kreševljakovića 3
71000 Sarajevo, BiH
Tel: +387 33 407 443
Fax: +387 33 208 341
Email: grad@sarajevo.ba
Web: www.sarajevo.ba



SADRŽAJ

- I. Uvod**
- II. Međunarodna saradnja na nivou gradova**
- III. Međunarodni skupovi**
- IV. Saradnja s diplomatsko-konzularnim predstavništvima**
- V. Ostale aktivnosti na planu međunarodne saradnje**
- VI. Aktivnosti Grada Sarajeva u okviru međunarodnih asocijacija**
- VII. Ocjena stanja**
- VIII. Programska orijentacija**
- IX. Zaključna razmatranja**

I. UVOD

Programom rada Gradskog vijeća Grada Sarajeva za 2021. godinu, broj 01-GV-02-1286/20, donesenim na sjednici od 30.12.2020. godine, Programom gradonačelnika Grada Sarajeva za 2021. godinu i Programom međunarodne saradnje Grada Sarajeva za 2021. godinu, predviđen je Izvještaj o aktivnostima Grada Sarajeva u oblasti međunarodne saradnje u 2020. godini.

U skladu sa Programom i ciljevima međunarodne saradnje Grada Sarajeva za 2020. godinu, aktivnosti u oblasti međunarodne saradnje odvijale su se na bilateralnom nivou u formi saradnje sa pobratimskim, partnerskim i drugim gradovima i međunarodnim institucijama, na multilateralnom nivou kroz učestvovanje u međunarodnim skupovima, u radu međunarodnih asocijacija čiji je Grad Sarajevo član, te kroz saradnju s diplomatsko - konzularnim predstavništvima u BiH i izvan nje.

Godina 2020. je karakteristična po pandemiji koronavirusa COVID-19 koja je imala značajan uticaj na sve segmente života na globalnom nivou, pa tako i na intenzitet i dinamiku međunarodne i međugradske saradnje.

Grad Sarajevo je u izvještajnom periodu, u skladu sa datim okolnostima, nastavio trend razvoja i intenziviranja postojeće saradnje i iniciranja saradnje sa novim gradovima i institucijama, te je doprinio daljnjoj afirmaciji glavnog grada BiH kao političkog, privrednog, kulturnog, sportskog i turističkog centra regije i Evrope uopće.

Aktivnosti Grada Sarajeva u oblasti međunarodne saradnje odvijale su se neometano i u skladu sa očekivanom dinamikom sve do izbijanja epidemije, odnosno pandemije COVID-19, radi koje su bile otkazane brojne aktivnosti planirane Programom međunarodne saradnje Grada Sarajeva za 2020. godinu, među kojima su:

- Obilježavanje Dana grada Sarajeva u prisustvu gostiju iz pobratimskih/partnerskih gradova.
- Posjeta delegacije Grada Sarajeva pobratimskim/partnerskim i drugim gradovima povodom obilježavanja datuma od značaja za te gradove ili nekim drugim povodom.
- Održavanje tradicionalnog Austrijskog bala u Vijećnici.
- Festival zimskih sportova za univerzitetske studente zemalja Srednje i Istočne Evrope i NR Kine.
- 5. Samit gradonačelnika glavnih gradova Srednje i Istočne Evrope i NR Kine 17+1, čije održavanje je pomjereno za drugu polovinu 2021. godine.
- Kulturna manifestacija „Dani kulture Burse u Sarajevu”.

Uvođenjem stanja prirodne nesreće u BiH u martu 2020. godine, kada su vlasti na svim nivoima organizovanja počele donositi mjere u cilju zaštite zdravlja i života građana, službene posjete inostranih delegacija Gradu Sarajevu, odnosno službene posjete delegacija Grada Sarajeva inostranstvu bile su otkazane, dok su neke realizirane u drugom dijelu godine, u skladu sa okolnostima koje su nalogale epidemiološke mjere.

Na međunarodnom nivou, održavanje konferencija, skupova i bilateralnih sastanaka je otkazano ili pomjereno, ali je u najvećoj mjeri održavano „online“ kako bi se obezbijedio kontinuitet u saradnji, razmjeni iskustava i znanja.

Ovo razdoblje pokazalo je da se gradovi, bez obzira na nivo razvoja, mogu suočiti sa neočekivanim i do sad neviđenim izazovima, te je ukazalo na ključnu ulogu lokalnih i regionalnih vlasti i važnost

njihove međusobne saradnje u cilju postizanja odgovora na krizu. Pandemija je dovela do ujedinjenja na globalnom nivou, podstakla je jedan poseban vid humanosti, zajedništva i solidarnosti kroz pružanje pomoći onima kojima je najpotrebnija. Mnogi gradovi, međunarodne asocijacije i međunarodne institucije pokretali su inicijative za dijeljenje informacija o izazovima sa kojima se suočavaju, o iskustvima i provođenju mjera koje su se pokazale najboljim rješenjima, putem zajedničke platforme ili u međusobnom direktnom kontaktu. Grad Sarajevo se pridružio nekim od tih inicijativa i dijelio svoja iskustva i mjere koje su poduzimane sa ciljem sprečavanja širenja koronavirusa.

Grad Sarajevo je u jeku pandemije COVID-19 uputio pismo podrške mnogim pobratimskim i prijateljskim gradovima, kao i pomoć u vidu medicinske zaštitne opreme italijanskim pobratimskim gradovima Ferrari, Pratu i Veneciji.

Na inicijativu Grada Sarajeva, a u cilju što bolje opskrbe zdravstvenih ustanova i građana Sarajeva medicinskom zaštitnom opremom, Grad Šangaj je poslao kontigent zaštitnih maski.

Grad Friedrichshafen i Udruženje građana „Pro Sarajevo“ iz Friedrichshafena donirali su novčana sredstva Domu zdravlja „Omer Maslić“ za nabavku hitne medicinske opreme.

Grad Sarajevo je obezbijedio logističku podršku u smislu prijevoza ljekarskog tima koji je otputovao u Novi Pazar kako bi pomogao zdravstvenim radnicima u Sandžaku u borbi protiv COVID-19.

Na inicijativu Grada Sarajeva, pobratimski gradovi Magdeburg i Innsbruck donirali su po jedno sanitetsko vozilo u cilju poboljšanja zdravstvenog sistema u okviru borbe za sprečavanje širenja pandemije koronavirusa.

U znak podrške borbi protiv pandemije COVID-19, sarajevska Vijećnica je bila osvjetljena bojama zastava Republike Italije, IR Iran, SAD, Kraljevine Španije, Republike Turske i Sandžaka. Zastavom Države Katar Vijećnica je bila osvjetljena u znak zahvalnosti za pomoć BiH u borbi protiv koronavirusa.

Od aktivnosti iz oblasti međunarodne saradnje koje su realizirane u izvještajnom periodu, izdvajamo sljedeće:

- Na poziv Kongresa SAD-a, gradonačelnik Sarajeva Abdulah Skaka je prisustvovao 68. tradicionalnom molitvenom doručku u Washingtonu.
- Delegacija Grada Sarajeva boravila je u službenoj posjeti Gradu Daytonu, a u sjedištu Ujedinjenih nacija u New Yorku sastala se sa visokim zvaničnicima ove organizacije.
- Kao rezultat dogovora gradonačelnika Sarajeva i Podgorice, u Sarajevu su se početkom godine sastali projektni timovi dva grada, kako bi definirali zajedničko učešće u projektima prekogranične saradnje i privlačenja sredstava iz pretpripravnih i drugih međunarodnih fondova.
- U okviru 70. međunarodnog filmskog festivalu u Berlinu održana je promocija dodjele statusa grada filma UNESCO-a Sarajevu.

- Gradonačelnici Sarajeva i poljskog Grada Oswiecima (njemački naziv Auschwitz), Abdulah Skaka i Janusz Chwierut, razgovarali su o uspostavljanju saradnje između dva grada koja dijele burnu prošlost, povezujući Informativni centar o MKSJ Sarajevo i Memorijalni centar u Oswiecimu.
- Uspostavljena je saradnja sa Gradom Mannheimom koji je među vodećim njemačkim gradovima posvećenim implementaciji globalnih ciljeva održivog razvoja do 2030. godine.
- Delegacija Grada Sarajeva boravila je u službenoj posjeti pobratimskom Gradu Magdeburgu.
- Delegacija Grada Sarajeva je sa predstavnicima Odjela za ekonomski razvoj Vlade Dubaija razgovarala o uspostavljanju saradnje između Grada Sarajeva i Grada Dubaija.
- Gradonačelnik Sarajeva Abdulah Skaka održao je online sastanke sa gradonačelnicima Teherana, Ankare, Novog Pazara, Burse i Konye.
- Posjeta Njegovog Presvijetlog Visočanstva Princa Alberta II od Monaka povodom otvorenja Olimpijskog muzeja, te uručenje Ključa Grada Sarajeva za njegovo zalaganje za razvoj i promociju sporta; te očuvanje civilizacijskih vrijednosti i promociju mira.
- Delegacija Grada Burse posjetila je Sarajevo u februaru kada je obnovljen „Protokol o saradnji između Grada Sarajeva i Grada Burse“, te u oktobru kada se razgovaralo o saradnji između privrednih subjekata i učešću Grada Burse u revitalizaciji Crvene tabije kao jednog od kulturno-historijskih naslijeđa.
- Profesionalna vatrogasna brigada Grada Beča uručila je tri vatrogasna vozila Profesionalnoj vatrogasnoj brigadi Kantona Sarajevo. Radi se o jednoj u nizu donacija koje je Grad Beč u proteklih deset godina poklonio sarajevskim vatrogascima i nastavku višegodišnje saradnje gradova prijatelja.
- Grad Sarajevo je podržao učešće učenika Druge gimnazije i Prve bošnjačke gimnazije u moskovskoj Međunarodnoj olimpijadi Metropol, koji su u online takmičenju iz matematike, informatike i fizike osvojili šest medalja.
- Gradovi Sarajevo i Beijing, u svojstvu organizatora i suorganizatora, pokrenuli su pripremne aktivnosti u vezi organizacije 5. Foruma glavnih gradova Centralne i Istočne Evrope i NR Kine 17+1, koji će se održati u Sarajevu u drugoj polovini 2021. godine.
- Na Svečanoj sjednici Gradskog vijeća Grada Sarajeva, održanoj 22.12.2020. godine, dobitnicima Priznanja „Počasni građanin Grada Sarajeva“ proglašeni su Branko Crvenkovski, prof. dr. Christian Schwarz-Schilling i Jure Franko, a dobitnikom „Plakete Grada Sarajeva“ proglašen je prof. dr. Halil Güneş.

Grad Sarajevo je učestvovao u međunarodnim skupovima od kojih izdvajamo:

- Online konferenciju „Bridge for Cities 2020“ koja je održana u organizaciji Ujedinjenih nacija za industrijski razvoj (UNIDO) i Grada Beča.

- „Forum gradonačelnika“ koji je u organizaciji Ekonomske komisije Ujedinjenih nacija za Evropu (UNECE), održan u Palati nacija, u Ženevi.

Učešće u okviru međunarodnih asocijacija čiji je Grad Sarajevo član:

- Grad Sarajevo je učestvovao u radu Generalne skupštine Svjetske unije olimpijskih gradova (UMVO), održane online, na kojoj je jednoglasno izabran za člana Izvršnog odbora Unije.
- Grad Sarajevo je učestvovao u radu Generalne konferencije Evropske koalicije gradova protiv rasizma, održane online, pod nazivom „CommunicAtion – Zajedno za zaštitu ljudskih prava na lokalnom nivou“.
- Grad Sarajevo je učestvovao u radu 16. Generalne skupštine Mreže mediteranskih gradova „MedCities“, održane online.

Saradnja s diplomatsko konzularnim predstavništvima:

Grad Sarajevo su posjetili ili je ostvaren kontakt sa predstavnicima diplomatsko-konzularnih predstavništava među kojima su Velika Britanija, Republika Italija, Crna Gora, Republika Indonezija, IR Iran, Država Libija, Republika Turska, Republika Austrija, Država Palestina.

Dokumenti koji su potpisani tokom 2020. godine:

- „Protokol o saradnji između Grada Sarajeva i Grada Burse“ iz 1972. godine, obnovljen je potpisivanjem „Protokola o saradnji“ od strane gradonačelnika Sarajeva i Burse, Abdulaha Skake i Alinura Aktaša, u Sarajevu 26.2.2020. godine.
- „Pariška deklaracija“ koju su gradonačelnik Sarajeva Abdulaha Skaka i Izvršna direktorica „Partnerstva za zdravlje“ Aida Kurtović potpisali 4.5.2020. godine, te se obavezali na sprovođenje aktivnosti u cilju podizanja svijesti o suzbijanju AIDS-a.
- „Sporazum o saradnji na projektu nove biciklističke staze Sarajevo - Pale“, potpisan je 8.7.2020. godine između Grada Sarajeva, Općina Sarajevo Stari grad, Istočni Stari grad i Pale. Inicijator projekta je bio šef Delegacije EU u BiH i specijalni predstavnik EU ambasador Johann Sattler.
- „Memorandum o razumijevanju između Grada Sarajeva i Grada Mannheima“ potpisan u Mannheimu 12.10.2020. godine.

II. MEĐUNARODNA SARADNJA NA NIVOU GRADOVA

Ceremonija otvorenja Zimskih olimpijskih igara mladih, Lausanne (Švicarska), 9. - 10.1.2020.

Na poziv gradonačelnika Lausanne i predsjednika Svjetske unije olimpijskih gradova (UMVO) Grégorie Junoda, gradonačelnik Sarajeva Abdulah Skaka prisustvovao je ceremoniji otvorenja Zimskih olimpijskih igara mladih (YOG), koje je održano u Lausanni.

Grad u kojem se nalazi sjedište Međunarodnog olimpijskog komiteta (MOK), od 9. do 22.1.2020. godine bio je domaćin trećeg izdanja Zimskih olimpijskih igara mladih (YOG), nakon Innsbrucka 2012. godine i Lillehammera 2016. godine, na kojem je nastupilo rekordna 1.872 učesnika, uzrasta od 15 do 18 godina, iz 79 država.

Na Igrama je BiH predstavljalo devet sportašica i sportista u četiri sporta – alpskom skijanju, biatlonu, skijaškom trčanju i sanjkanju.

Na margini ovog događaja, gradonačelnik Skaka sastao se sa gradonačelnikom Lausanne sa kojim je razgovarao o saradnji dvaju gradova, posebno u oblasti sporta, kao i o uspješno organiziranom Evropskom olimpijskom festivalu za mlade EYOF-u 2019.

Razgovarano je o predstojećem otvorenju obnovljenog Olimpijskog muzeja u Sarajevu, te o mogućnosti da Sarajevo bude domaćin Godišnjeg samita Svjetske unije olimpijskih gradova (UMVO) u oktobru 2021. godine.

Sastanak sa predstavnikom Visoke stručne škole iz Beča, Sarajevo, 14.1.2020.

Grad Sarajevo je posjetio predstavnik bečke Visoke stručne škole (FH Wien) Mag. Wolfgang Tomaschitz, koji je tokom sastanka sa predstavnicima Službe za evropske integracije i EU fondove i Službe za lokalnu samoupravu i razvoj grada, održanog 14.1.2020. godine, prezentirao program studija „International diplomacy and Urban policy“.

Radi se o studiju koji pokreću Grad Beč i Visoka stručna škola (FH Wien) i na koji Grad Beč želi pozvati kvalifikovane saradnike gradskih uprava iz gradova u kojima ima svoje Eurocomm urede (Beograd, Bratislava, Bukurešt, Krakov, Ljubljana, Prag, Sarajevo, Sofija, Zagreb). Dvije trećine troškova snosio bi Grad Beč, master studij traje dvije godine u intervalima, a radni jezik je engleski. Fokus ovog studija su teme komunalne usluge/servis građanima, mobilnost, digitalizacija, unapređenje kulture i socijalna sigurnost.

Nakon sastanaka sa svih devet gradova, Grad Beč će sumirati ideje i prilagoditi plan programa potrebama gradova te će dostaviti draftove silabusa gradovima.

Službena posjeta delegacije Grada Bonna (SR Njemačka), Sarajevo, 16. - 19.1.2020.

Delegacija Grada Bonna koju su činili gradski menadžer Wolfgang Fuchs, rukovodilac Službe za urbano planiranje, zaštitu okoliša i kontrolu gradnje Helmut Wiesner i rukovodilac službe za fondove i EU fondove Hans Jürgen Hartmann, boravila je u Sarajevu od 16. do 19.1.2020. godine.

Povod posjete je inicijativa koju je Grad Bonn, posredstvom Goethe Instituta u BiH, uputio Gradu Sarajevu da se pridruži programu stručnog osposobljavanja WET Worldwide „Nice to work with you – Lijepo je raditi sa vama”, koji finansira EU kroz program financiranja Erasmus plus, a koji omogućava razmjenu uposlenika dva grada iz određenih oblasti od zajedničkog interesa.

Glavni zadatak projekta je organizovanje stažiranja uposlenika Grada Bonna u evropskim gradskim upravama, u ovom slučaju u Sarajevu, kao i stažiranja uposlenika Grada Sarajeva u Gradskoj upravi Bonna. Projekat stvara uvjete za razmjenu ideja i praksi, kao i za poboljšanje poznavanja stranih jezika i kulturnog razumijevanja. Grad Bonn od 2014. godine potiče razmjenu s evropskim gradovima, a do 2018. godine oko 100 uposlenika je bilo u mogućnosti da stekne svoja iskustva tokom “evropskog stažiranja”.

Nakon sastanka sa zamjenikom gradonačelnika Milanom Trivićem, upriličen je radni sastanak sa predstavnicima gradskih službi i odsjeka, koji su ukratko prezentirali aktivnosti i projekte, te odgovarali na pitanja u skladu sa interesovanjem njemačke delegacije. Tokom boravka, delegacija se upoznala i sa poslovanjem Vijećnice, Informativnog centra MKSJ i Sarajevske žičare.

Nakon evaluacije rezultata posjete, Grad Bonn je iskazao interes za Sarajevsku žičaru kao primjer dobre prakse u urbanom razvoju, budući da Bonn također planira gradnju žičare, te će se u tom kontekstu nastaviti saradnja u okviru projekta „Nice to work with you”.

Dan grada Dubrovnika, Dubrovnik (Republika Hrvatska), 2. - 3.2.2020.

Na poziv gradonačelnika Dubrovnika Mate Frankovića, delegacija Grada Sarajeva koju su činili zamjenik gradonačelnika Milan Trivić i gradski vijećnici Snežana Omukić i Srđan Simonović, prisustvovali su obilježavanju Dana grada Dubrovnika i Festi Sv. Vlaha.

Gradonačelnik Dubrovnika Mato Franković, zamjenica Jelka Tepšić, predsjednik Gradskog vijeća Marko Potrebića i pročelnica Upravnog odjela za evropske fondove, regionalnu i međunarodnu suradnju Zrinka Raguž, sastali su se 3.2.2020. godine sa delegacijama gradova prijatelja, i to Sarajeva, Rueil Malmajsona, Bad Homburg, i Vukovara. Tom prilikom, domaćini su se zahvalili gostima što su svojim dolaskom uveličali Dan grada, te istaknuli želju za aktivnijom saradnjom i razvojem novih projekata, posebno na polju turizma i kulture.

Obilježavanje tradicionalnih Dana Nikole Tesle, Zagreb (Republika Hrvatska), 4.2.2020.

Na poziv gradonačelnika Zagreba Milana Bandića, obilježavanju tradicionalnih „Dana Nikole Tesle“, koje je u organizaciji Udruge Nikola Tesla – Genij za budućnost i uz podršku Grada Zagreba održano u Zagrebu 4.2.2020. godine, u ime Grada Sarajeva prisustvovali su zamjenica predsjedavajućeg Gradskog vijeća Edina Gabela i zamjenik gradonačelnika Ivica Šarić.

U okviru ovog događaja održana je panel diskusija pod nazivom „Saradnja tri grada: Zagreb, Sarajevo i Beograd“, u kojoj su predstavnici gradova predložili moguće oblike saradnje u promociji lika i djela Nikole Tesle.

68. tradicionalni molitveni doručak, Washington (SAD), 5.2.2020.

Na poziv Kongresa SAD-a, gradonačelnik Sarajeva Abdulah Skaka prisustvovao je 5.2.2020. godine 68. tradicionalnom molitvenom doručku u Washingtonu, gdje je zajedno sa liderima, zvaničnicima, poduzetnicima, aktivistima za ljudska prava i utjecajnim ličnostima iz cijelog svijeta učestvovao u jednom od najvećih i najvažnijih diplomatskih događaja tokom godine u SAD.

Gradonačelnik Sarajeva, u čijoj pratnji je bio direktor JP Sarajevo d.o.o. Ensar Eminović, imao je niz važnih kontakata i razgovora. Tokom susreta sa utjecajnim kongresmenima Robertom Aderholtom i Jeffom Fortenberryjem, gradonačelnik je razgovarao o političkoj situaciji u BiH, projektima podrške SAD-a Bosni i Hercegovini i njenom glavnom gradu, te kako postignuti napredak na putu ka NATO, koji je od vitalnog značaja za BiH, stvara ambijent sigurnosti koji je temelj ekonomskog napretka.

Tokom susreta sa Maureen Cormack, prvom zamjenicom pomoćnika američkog državnog sekretara za Evropu i Euroaziju, te bivšom ambasadoricom SAD-a u BiH, razgovarano je o implementaciji projekta deminiranja čiji je rok za implementaciju bio kraj septembra 2020. godine. Uspješna realizacija ovog historijskog projekta otvara vrata za nove projekte u interesu građana Sarajeva.

Generalno, susreti u Kongresu i State Departmentu bili su prilika da se rezimira dosadašnja saradnja i razmotre mogućnosti za jačanje odnosa. Razgovor gradonačelnika Skake sa republikanskim senatorima bio je posebno značajan, a tokom svih susreta u SAD iskazana je snažna podrška projektima važnim za grad Sarajevo, te političku stabilnost.

Službena posjeta Gradu Daytonu (SAD), 7. - 9.2.2020.

Na poziv gradonačelnice Daytona Nan Wahley, delegacija Grada Sarajeva koju su činili predsjedavajući Gradskog vijeća Igor Gavrić, gradonačelnik Abdulah Skaka i direktor JP Sarajevo d.o.o. Ensar Eminović, boravili su u Daytonu od 7. do 9.2.2020. godine.

Predstavnici dva grada razgovarali su o nastavku saradnje koja je ozvaničena 1999. godine. Istaknuto je da se 2020. godine navršava 25 godina od potpisivanja Daytonskog mirovnog sporazuma, koji je dogovoren i parafiran u vojnoj bazi Wright-Patterson u ovom američkom gradu u državi Ohio. Tokom sastanka bilo je govora i o obilježavanju te godišnjice i zajedničkim aktivnostima. Dogovoreno je da dio eksponata iz vojne baze gdje su održani daytonski pregovori, bude prenesen u Sarajevo kako bi bili dio muzejske postavke.

Također, razgovarano je i o primjeni „Memoranduma o razumijevanju“ kojim su uspostavljeni pobratimski odnosi između Sarajeva i Daytona. Potpisnici su bili tadašnji gradonačelnici Sarajeva i Daytona, Rasim Gačanović i Michael Turner. Memorandum je potpisan u duhu mira i dobre volje koja je pokrenuta Daytonskim mirovnim sporazumom. Ovaj sporazum predstavlja partnerstvo između Sarajeva i Daytona kako bi se unaprijedili znanje i prosperitet građana ova dva grada. Potpisivanje Memoranduma je formalno priznanje da stanovnici Sarajeva i Daytona dijele posebnu vezu koja savladava kulturne razlike, jezičke barijere i razdaljinu.

Delegacija Sarajeva i Istočnog Sarajeva na prijemu u UN-u, New York (SAD), 10.2.2020.

Na poziv podsekretara Ujedinjenih nacija i specijalnog savjetnika Generalnog sekretara UN-a Adama Dienga, delegacija predvođena predsjedavajućim Gradskog vijeća Grada Sarajeva Igorom Gavrićem, gradonačelnikom Sarajeva Abdulahom Skakom i gradonačelnikom Istočnog Sarajeva Nenadom Vukovićem, sastala se 10.2.2020. godine u New Yorku, u sjedištu Ujedinjenih nacija, sa visokim zvaničnicima ove organizacije.

Prijem je organiziran na godišnjicu otvorenja Evropskog olimpijskog festivala za mlade (EYOF) koji je održan 10.2.2019. godine u Sarajevu na stadionu „Asim Ferhatović Hase“.

Dieng je upravo zbog uspješne organizacije EYOF-a, ranije, uručio Skaki i Vukoviću posebna priznanja za doprinos saradnji, miru i dijalogu kroz uspješnu organizaciju EYOF. Tokom susreta u sjedištu najveće svjetske organizacije bilo je govora o pozitivnim efektima ovog sportskog događaja za BiH te o mogućnostima da naša država i grad budu domaćini još značajnijih sportskih smotri.

U delegaciji su bili i direktor JP Sarajevo d.o.o. Ensar Eminović i šef Kabineta gradonačelnika Istočnog Sarajeva Ognjen Jugović.

Službena posjeta projektnog tima Grada Podgorice, Sarajevo, 12.-14.2.2020.

Projektni tim Grada Podgorice, koji su činile savjetnice za međunarodne projekte i prekograničnu saradnju Albina Međedović i Branka Knežević, te savjetnica za razvojne projekte Teodora Kusovac, bio je gost Grada Sarajeva od 12. do 14.2.2020. godine.

Ova posjeta je uslijedila kao rezultat dogovora gradonačelnika Sarajeva i Podgorice, Skake i Vukovića, postignutog prilikom službene posjete crnogorskoj prijestolnici u decembru 2019. godine povodom obilježavanja 19. decembra - Dana Glavnog grada Podgorica.

Podgorička delegacija i predstavnici Grada Sarajeva, na čelu sa pomoćnicom gradonačelnika za evropske integracije i EU fondove Milom Eminović, održali su radni sastanak 13.2.2020. godine, tokom kojeg su razmijenjena iskustva i prakse u projektnim aktivnostima dva grada. Gošće su informisale o načinu organizacije i rada Mreže općinskih projekt menadžera u Crnoj Gori koja funkcioniše na nivou Saveza općina i gradova.

Gradovi Sarajevo i Podgorica spremni su svoje bliske veze još više ojačati uvezivanjem projektnih timova sa ciljem zajedničkog učešća u projektima prekogranične saradnje i privlačenja sredstava iz pretpristupnih i drugih međunarodnih fondova.

Dogovoreno je da u skorije vrijeme dva glavna grada pristupe i potpisivanju sporazuma o saradnji projekat timova Sarajeva i Podgorice kojim će se definirati modaliteti zajedničkog učešća u projektima, kao i razmjene iskustava i znanja, te pružanja mentorstva i trening obuke za uposlenike gradskih uprava.

Delegacija je održala sastanak i sa predstavnicima Sarajevske regionalne razvojne agencije (SERDA), a potom je obišla Vijećnicu i Informativni centar o MKSJ Sarajevo.

Kulturna manifestacija 53. Šokačko sijelo, Županja (Republika Hrvatska), 22.-23.2.2020.

Na poziv direktora Ureda Turističke zajednice grada Županje Mirka Bačića, zamjenik gradonačelnika Milan Trivić prisustvovao je najstarijoj i najvećoj manifestaciji tradicijske kulture Županijskog kraja, 53. Šokačkom sijelu, koje je pod nazivom „Odavno smo graničari stari“, održano u Županji 22. i 23.2.2020. godine. U okviru III. Večeri folklora upriličena je prigodna dodjela zahvalnica i poklona za saradnju između Županje i Sarajeva.

Službena posjeta delegacije Grada Burse (Republika Turska), Sarajevo, 26.2.2020.

Višečlana delegacija turskog pobratimskog Grada Burse koju je predvodio gradonačelnik Alinur Aktaş, posjetila je Grad Sarajevo 26.2.2020. godine. Prilikom prijema u Vijećnici, gradonačelnik Abdulah Skaka je kazao da gradovi Sarajevo i Bursa imaju komplementarne prednosti i ogroman potencijal za saradnju. Istaknuto je da gradske administracije ova dva prijateljska grada mogu brže i

bolje saradivati i povezati se preko projekata u oblasti privrede, trgovine, obrazovanja, turizma i kulture, te organiziranjem posjeta zaposlenika oba grada.

Na prijedlog gradonačelnika Burse, gradonačelnici Skaka i Aktaş su obnovili „Protokol o saradnji“ iz 1972. godine, potpisivanjem „Protokola o saradnji“ u skladu sa današnjim uvjetima, kojim će se odnosi između naša dva grada dodatno unaprijediti na što veći mogući nivo.

Gradonačelnik Aktaş je poručio da jačanje veza Sarajeva sa Bursom, znači i jačanje ekonomskih veza sa čitavom Turskom, jer je Bursa grad sa najrazvijenijim privatnim sektorom i najjačom ekonomijom poslije Istanbula.

Razgovarano je i o radu na zajedničkim međunarodnim projektima, te organizaciji „Dana kulture Burse u Sarajevu” u julu 2020. godine, odnosno „Dana kulture Sarajeva u Bursi” 2021. godine.

Pismo podrške partnerskim gradovima u borbi protiv pandemije COVID-19, mart 2020.

U jeku borbe protiv pandemije COVID-19, gradonačelnik Abdulah Skaka je u martu 2020. godine uputio pismo podrške pobratimskim i prijateljskim gradovima među kojima su Atina, Barcelona, Beijing, Beograd, Collegno, Dubrovnik, Ferrara, Kotor, Ljubljana, Madrid, Napoli, Novi Pazar, Podgorica, Prato, Skoplje, Tianjin, Tirana, Venecija, Zagreb.

Poruka podrške Zagrebu osvjetljenjem sarajevske Vijećnice, 23.3.2020.

U periodu kada se cijeli svijet borio protiv pandemije COVID-19, Grad Zagreb je zadesio jedan od najsnažnijih potresa u historiji. Grad Sarajevo je poslao gradu Zagrebu iskrenu i snažnu poruku podrške i prijateljstva osvjetljenjem sarajevske Vijećnice 22.3.2020. godine, kao i telegram podrške gradonačelniku Milanu Bandiću.

Čestitke gradova povodom 6. aprila – Dana grada Sarajeva, 6.4.2020.

Gradonačelnik Abdulah Skaka je povodom 6. aprila – Dana grada Sarajeva, primio čestitke brojnih pobratimskih i prijateljskih gradova. Najbolje želje za Dan grada građankama i građanima bh. prijestolnice uputili su gradonačelnici Istanbula, Magdeburga, Collegna, Ferrare, Friedrichshafena, Dubrovnika, Volgograda, Pule, Wolfsburga, Atine, Novog Pazara, Podgorice, Prilepa, Zagreba, Skoplja. Čestitkama su se pridružili i Venecija, Berlin, Beč, Ljubljana, Tirana, Prato, Budimpešta.

U čestitkama je iskazano uvjerenje da će aktuelna gradska administracija na čelu sa gradonačelnikom Skakom, nastaviti da ulaže energiju u daljnji razvoj i napredak Sarajeva, koji je postao prepoznatljiva evropska metropola, velikih potencijala i otvorenih mogućnosti. Također su poručili da vjeruju da će se, uz već dokazano zajedništvo, uspješno prebroditi pandemija COVID-19, te da će prijateljstvo među gradovima biti snažnije nego ikad prije.

Grad Sarajevo se priključio inicijativi „Light4U“, 12.4.2020.

Grad Budimpešta je pokrenuo inicijativu u kojoj gradovi zajedno sa hotelima organiziraju paljenje svjetala kojima se formira poruka 4U (Za Vas), kao čin solidarnosti s građanima i gradovima širom Evrope i svijeta, dok traju mjere zaštite od COVID-19. Hoteli i turistički sektor su posebno pogođeni krizom te se na ovaj način javnosti poslala važna poruka solidarnosti, posebno u saniranju posljedica krize.

Sarajevo je jedan od gradova koji se priključio inicijativi „Light4U“, te su 12.4.2020. godine, u večernjim satima, na hotelima Ibis Styles, Swissotel i Hills upaljena svjetla u obliku poruke 4U.

Pomoć gradovima Ferrari, Pratu i Veneciji u borbi protiv pandemije COVID-19, 24.4.2020.

Imajući u vidu da je Republika Italija bila jedna od najteže pogođenih zemalja pandemijom COVID-19, Grad Sarajevo je odlučio pružiti pomoć u borbi protiv širenja koronavirusa italijanskim pobratimskim gradovima Ferrari, Pratu i Veneciji. Pomoć je sadržavala medicinsku zaštitnu opremu (medicinske maske, vizire, dezinfekciona sredstva) proizvedenu u BiH.

Venecija je prvi italijanski grad sa kojim je Grad Sarajevo uspostavio pobratimske odnose 1994. godine. Venecija je u više navrata slala pomoć građanima Sarajeva tokom opsade i imala je značajnu ulogu u procesu formiranja, djelovanja i u internacionalnoj promociji Projekta Ars Aevi.

Pobratimski odnosi sa Pratom iz regije Toskana, uspostavljeni su 1997. godine, čemu je prethodila značajna pomoć koju je ovaj italijanski grad pružao građanima Sarajeva tokom opsade 1992.-1995. godine. Saradnja je nastavljena sve do danas, a od 2006. godine uspostavljene su veze s Općinom Novo Sarajevo.

Pobratimski odnosi sa Ferrarom iz regije Emilija-Romanja, uspostavljeni su 1998. godine, a bliskim vezama prethodila je kulturna saradnja od 1984. godine, kada je za vrijeme trajanja XIV Zimskih olimpijskih igara, u bh. prijestolnici održana izložba slikara iz Ferrare. Sporazumom o bratimljenju između Sarajeva i Ferrare predviđena je saradnja u oblasti kulture, sporta, obrazovanja, urbanog planiranja, privrede, usluge građanima, pitanjima mladih.

Pomoć Grada Šangaja u medicinskom materijalu, 30.4.2020.

Na inicijativu Grada Sarajeva, Grad Šangaj je poslao građanima Sarajeva zaštitne maske u borbi protiv pandemije COVID-19. Ambasador NR Kine u BiH Ji Ping uručio je gradonačelniku Sarajeva Abdulahu Skaki zaštitne maske (3.000 komada medicinskih maski i 18.000 nemedicinskih maski) u Vijećnici 30.4.2020. godine.

Gradonačelnik Skaka je 7.5.2020. godine posjetio Krizni štab JU Dom zdravlja KS, te uručio dio donacije pomenutih zaštitnih maski, a dio donacije je istog dana distribuisan i Općoj bolnici „Abdulah Nakaš“, JU Zavodu za hitnu medicinsku pomoć Kantona Sarajevo i JU Zavod za medicinu rada Kantona Sarajevo.

Donacija Grada Friedrichshafena Domu zdravlja „Omer Maslić“

Za nabavku hitne medicinske opreme u borbi protiv širenja koronavirusa, Domu zdravlja „Omer Maslić“ Grad Friedrichshafen je donirao 5.000,00 eura, a Udruženje građana „Pro Sarajevo“ iz Friedrichshafena doniralo je 3.000,00 eura.

Online sastanak gradonačelnika Sarajeva i Teherana, 9.6.2020.

Gradonačelnici Sarajeva i Teherana, Abdulah Skaka i Pirouz Hanachi, putem skypea su razgovarali o globalnoj krizi izazvanoj koronavirusom i o mjerama koje su njihove zemlje i gradovi preduzeli u sprječavanju epidemije.

Gradonačelnik Teherana je zahvalio gradonačelniku Sarajeva na podršci vladi i narodu IR Iran u borbi protiv koronavirusa, iskazanoj osvjetljenjem Vijećnice bojama iranske zastave 20.3.2020.

godine. Dvoje zvaničnika razgovaralo je i o nastavku saradnje između Sarajeva i Teherana, koji su uspostavili pobratimske odnose 2016. godine.

Prijem italijanskih vojnih ljekara, Sarajevo, 18.6.2020.

Gradonačelnik Abdulah Skaka primio je u Vijećnici 18.6.2020. godine italijanske vojne ljekare majora Marina Trivisanija i majora Pasqualla Giannenlija koji su učestvovali u liječenju pacijenta u vrijeme pandemije koronavirusa u njihovoj zemlji. U pratnji gostiju iz Italije bio je i ambasador te zemlje Nicola Minasi.

Naime, prema nalogu Ministarstva odbrane Italije, vojni ljekari su stigli u BiH 6.5.2020. godine, kako bi tokom tromjesečnog boravka pružili podršku aktivnostima UN-a i posjećujući bh. bolnice podijelili sa našim zdravstvenim radnicima svoje znanje i iskustvo stečeno tokom borbe sa krizom koju je COVID-19 prouzrokovao u Italiji.

Glavni motiv Vladi ove prijateljske zemlje da samo u BiH uputi svoje ljekare bila je humana gesta Grada Sarajeva u vidu osvjetljenja Vijećnice u bojama italijanske zastave 14.3.2020. godine, kao znak solidarnosti i podrške u borbi protiv pandemije koronavirusa.

Vlada Italije je zajedno sa uredima UN-a i Svjetske zdravstvene organizacije u Sarajevu, organizirala i video-konferencije kako bi se razmijenila iskustva i zdravstveno - sanitarni protokoli između italijanskih eksperata i ljekara i zdravstvenih radnika iz BiH.

Tokom prijema, gradonačelnik Sarajeva je istakao da je tradicionalno prijateljstvo i naklonost sa narodom i Vladom Italije potvrđeno i u ovo krizno doba pandemije koronavirusa.

Podrška Festivalu RUTA (Regionalna unija teatar), Sarajevo, 22.6.2020.

Gradonačelnik Podgorice Ivan Vuković obratio se gradonačelniku Sarajeva početkom marta 2020. godine sa molbom da podrži održavanje i finansiranje Festivala Regionalne unije teatar RUTA. Članovi RUTA-e su šest teatar: MGL Ljubljana, Kazalište Ulysses Zagreb, Kamerni teatar 55 Sarajevo, Gradsko pozorište Podgorica, Dramski teatar Skoplje i Beogradsko dramsko pozorište. Cilj projekta je povezivanje, prezentacija i promocija svih članica unutar regiona.

RUTA je jedinstvena po svom modelu koji podrazumijeva da se festival periodično tokom jedne kalendarske godine seli u druge gradove članove Unije. Svako pozorište nastupa sa predstavom po sopstvenom izboru i jedan od ciljeva je kontinuirano prisustvo svih teatar tokom godine pred publikom u čitavom regionu.

Festival je uspješno održan u Beogradu u decembru 2019., u Podgorici u martu 2020., u Ljubljani se trebao održati u aprilu 2020. ali je zbog pandemije pomjeren za 2021. godinu, kada će se održati i u Sarajevu, Brijunima i Skoplju.

Gradonačelnik Skaka je iskazao spremnost Grada Sarajeva da 2021. godine podrži ovaj projekat koji će doprinijeti povezivanju sa glavnim gradovima regiona i nastavku dosadašnje uspješne saradnje.

Online sastanak gradonačelnika Sarajeva i Ankare, 23.6.2020.

Gradonačelnik Abdulah Skaka održao je 23.6.2020. godine online sastanak sa gradonačelnikom pobratimskog grada Ankare Mansurom Yavaşom i poželio mu uspješan mandat na poziciji prvog čovjeka turske prijestolnice.

Sagovornici su ocijenili da su odnosi Sarajeva i Ankare izuzetno dobri te da se odvijaju u duhu prijateljstva dva grada. Gradonačelnik Skaka je izrazio uvjerenje da će Sarajevo i Ankara ubuduće još više oplemeniti i učvrstiti međusobnu saradnju temeljenu na Sporazumu o bratimljenju iz 1994. godine, kroz projekte u oblasti privrede, trgovine, obrazovanja, turizma, kulture i zaštiti kulturno-historijskog naslijeđa.

Gradonačelnici su razmijenili informacije i iskustva na temu COVID-19 virusa i izazova sa kojima se dva grada suočavaju. Iskazali su uvjerenje da će, uz već dokazano zajedništvo i sve moguće kapacitete kojima raspolažu, uspjeti se suočiti i prebroditi pandemiju, te da će prijateljstvo između dvije prijestolnice biti još snažnije.

Uspostavljanje saradnje između Sarajeva i Oswiecima (Republika Poljska), 23.6.2020.

Gradonačelnik poljskog Grada Oswiecima Janusz Chwierut, koji je bio jedan od učesnika 30. Generalne skupštine Međunarodne asocijacije „Gradovi glasnici mira“ održane u Sarajevu 26. do 28.9.2019. godine, na marginama ovog događaja, sastao se sa gradonačelnikom Skakom, sa kojim je razgovarao o konkretnim modelima saradnje između Sarajeva i Oswiecima.

Tom prilikom, Chwierut je pozvao gradonačelnika Skaku da posjeti taj poljski grad u maju 2020. godine kako bi u okviru Mirovnog projekta „The Alley of Memory Trees“ zasadio drvo u aleji koja se sastoji od drveća iz gradova koji su iskusili rat. Ova aktivnost nije realizirana zbog pandemije COVID-19.

Gradonačelnik Skaka je 23.6.2020. godine uputio poljskom kolegi dopis sa prijedlogom o uspostavljanju saradnje naša dva grada, potpisivanjem sporazuma između glavnog grada BiH u kojem je sjedište Informativnog centra Međunarodnog krivičnog suda za bivšu Jugoslaviju (MKSJ), Grada Oswiecima, Muzeja Auschwitz-Birkenau i Memorijalnog centra Srebrenica – Potočari.

Prijedlog je prihvaćen uz napomenu da je Grad Oswiecim, dopisom od 31.8.2020. godine, obavijestio Grad Sarajevo da je zbog pandemije COVID-19, pomjerena sadnja drveta i susret sa predstavnicima Državnog muzeja Auschwitz-Birkenau za 2022. godinu.

Online sastanak gradonačelnika Sarajeva i Novog Pazara, 29.6.2020.

Povodom dramatičnih vijesti koje su pristizale iz Novog Pazara zbog velikog broja oboljelih građana i medicinskih radnika od koronavirusa, gradonačelnik Abdulah Skaka je 29.6.2020. godine putem videolinka razgovarao sa svojim kolegom, gradonačelnikom Nihatom Biševcom.

Gradonačelnik Skaka je kazao da se u Sarajevu i BiH s velikom pažnjom prati trenutno stanje u Novom Pazaru koji vodi tešku bitku sa pandemijom koronavirusa, te ponudio podršku Grada Sarajeva kao institucije i kao glavnog grada BiH. Istakavši posebnu vezu između naša dva grada, čije je tradicionalno prijateljstvo i naklonost potvrđeno uspostavom partnerskih odnosa, Skaka je dodao da se u ovoj zajedničkoj borbi gradovi trebaju držati skupa, solidarisati se i međusobno saradivati na zaštiti i dobrobiti svojih građana. Gradonačelnik Sarajeva je također izrazio uvjerenje

da će građani Novog Pazara i cijele regije Sandžaka uspjeti savladati i ovu tešku situaciju i oporaviti se.

Pomoć zdravstvenim radnicima u Sandžaku u borbi protiv koronavirusa, 10.7.2020.

Ljekarski tim iz Sarajeva koji su činili zdravstveni radnici Kliničkog centra Univerziteta u Sarajevu (KCUS), Univerzitetskog kliničkog centra (UKC) u Tuzli i sarajevske Hitne pomoći, otputovao je u Novi Pazar 10.7.2020. godine, kako bi pomogao zdravstvenim radnicima u Sandžaku u borbi protiv COVID-19. Gradonačelnik Sarajeva Abdulah Skaka je obezbijedio logističku podršku u smislu prijevoza ljekara.

Svečano otvorenje 71. Dubrovačkih ljetnih igara, Dubrovnik, 10.7.2020.

Na poziv gradonačelnika Dubrovnika Mate Frankovića, gradonačelnik Sarajeva Abdulah Skaka i zamjenik gradonačelnika Ivica Šarić, prisustvovali su svečanom otvorenju 71. Dubrovačkih ljetnih igara, koje su održane u tom gradu 10.7.2020. godine.

Tokom bilateralnog susreta, gradonačelnik Franković je izrazio interes za organizaciju retrospektivne izložbe slika, crteža i grafika maestra Safeta Zeca, u Dubrovniku u maju ili junu 2021. godine, kada bi se obilježila 14. godina službenog prijateljstva naša dva grada. S tim u vezi, Grad Dubrovnik je 20. jula uputio Pismo namjere.

Gradonačelnik Skaka i dogradonačelnik Šarić susreli su se i sa predsjednikom Republike Hrvatske Zoranom Milanovićem, kojem su uručili Cvijet Srebrenice, simbol borbe protiv genocida i masovnih stradanja ljudi. Ovaj simbolični poklon podsjetnik je i na prijateljski grad Vukovar koji je također doživio svirepu sudbinu.

Republika Hrvatska je u povodu obilježavanja 25. godišnjice genocida u Srebrenici, noć uoči 11. jula kod fontana u Ulici Hrvatske bratske zajednice u Zagrebu, prikazala svjetlosnu projekciju cvijeta „Sjećanje“.

U organizaciji Vijeća bošnjačke nacionalne manjine Dubrovačko-neretvanske županije i Vijeća bošnjačke nacionalne manjine Grada Dubrovnika, 11. jula je održan već tradicionalni „Mimohod sjećanja” na žrtve i genocid u Srebrenici. U mimohodu je sudjelovalo više stotina građana i gostiju Dubrovnika. Među učesnicima su, pored delegacije Grada Sarajeva, bili i dubrovački gradonačelnik Mato Franković, brojni gradski vijećnici, čelnici stranaka i građani Dubrovnika.

Prijem delegacije Bošnjačkog nacionalnog vijeća u Republici Srbiji, Sarajevo, 27.7.2020.

Gradonačelnik Abdulah Skaka sa saradnicima primio je u Vijećnici 27.7.2020. godine delegaciju Bošnjačkog nacionalnog vijeća u Republici Srbiji, koju su činili predsjednica dr. Jasmina Curić, sekretar Vijeća Mirza Hajdinović i stručna saradnica Esma Brunčević.

Predsjednica Bošnjačkog nacionalnog vijeća se zahvalila na pomoći koja je u vidu medicinskog osoblja iz Sarajeva i Tuzle pružena građanima Sandžaka u borbi protiv pandemije koronavirusa. Curić je iskazala priznanje i zahvalnost Gradu Sarajevu i gradonačelniku Skaki na solidarnosti i brizi u vremenu kada Sandžak vodi tešku bitku sa COVID-19, kao i na podršci u vidu simboličnog osvjetljenja Vijećnice. Istakla je da ova solidarnost još jednom potvrđuje dokazano prijateljstvo između Bošnjaka Sandžaka i Bošnjaka BiH, da će ovaj gest biti upisan u skorašnju historiju

Sandžaka, ali i da će Bošnjačko nacionalno vijeće inicirati da jedna ulica u Novom Pazaru dobije ime po ljekarima iz BiH.

Gradonačelnik Skaka je kazao da najteže krize i izazovi poput pandemije COVID-19, nisu samo prilika da pokažemo svoje jedinstvo i humanost, već i prilika da se započnu novi pozitivni procesi kreiranjem dobrih međusobnih odnosa Sarajeva sa Novim Pazárom i drugim gradovima Sandžaka.

Sagovornici su se složili da je ovo početak još bliže saradnje naročito u oblasti kulture, obrazovanja i ekonomije.

Sastanku su prisustvovali sekretar Gradske uprave Maja Hadžihalilović, pravobranilac Grada Sarajeva Sanjin Smajlović, i direktor JP Sarajevo d.o.o. Ensar Eminović, te dr. Rizvan Halilović.

Online sastanak gradonačelnika Sarajeva i Burse, 19.8.2020.

Gradonačelnici Sarajeva i turskog grada Burse, Abdulah Skaka i Alinur Aktaş, održali su online sastanak 19.8.2020. godine, tokom kojeg su se složili da Sarajevo i Bursa imaju ogroman potencijal za saradnju na obostranu korist njihovih građana.

Razmijenjena su iskustva i dobre prakse u okviru novonastale situacije izazvane koronavirusom, ali i o radu na zajedničkim međunarodnim projektima, te o mogućnostima organizacije „Dana kulture Burse u Sarajevu”, odnosno „Dana kulture Sarajeva u Bursi” koji su trebali biti organizirani 2020. godine. Grad Bursa je izrazio spremnost da sa Gradom Sarajevom učestvuje u projektu restauracije Firuz-begovog hamama na Baščaršiji.

Slijedom tog razgovora, gradonačelnik Skaka uputio je poziv gradonačelniku Aktašu da sa delegacijom posjeti Sarajevo u drugoj polovini septembra 2020. godine.

Posjeta Princa Alberta II od Monaka, Sarajevo, 8.-9.10.2020.

Na poziv gradonačelnika Abdulaha Skake, Njegovo Presvjetlo Visočanstvo Princ Albert II od Monaka, boravio je u Sarajevu u periodu od 8. do 9.10.2020. godine povodom ceremonije otvorenja Olimpijskog muzeja.

Gradonačelnik Abdulah Skaka, Princ Albert II od Monaka i predsjednik Olimpijskog komiteta BiH Izet Rađo, simboličnim presijecanjem vrpce otvorili su obnovljeni Olimpijski muzej 8.10.2020. godine.

Njegovom presvjetlom visočanstvu Princu Albertu II od Monaka, gradonačelnik Abdulah Skaka i predsjedavajući Gradskog vijeća Igor Gavrić 9. oktobra uručili su Ključ Grada Sarajeva u Vijećnici. Ovo priznanje je uručeno Princu Albertu II za njegov nemjerljiv značaj za promociju bh. sporta i Olimpijskog komiteta BiH, te kao najbolji način da mu se glavni grad BiH simbolično oduži za nesebičnu pomoć, zalaganje za razvoj i očuvanju civilizacijskih vrijednosti i promociju mira.

Tokom obilaska grada, gradonačelnik Skaka upoznao je Princa Alberta II sa historijom Sarajeva, kulturnom baštinom grada i pokazao najznačajnije građevine u užoj gradskoj jezgri. Njegovo visočanstvo je šetnju našim glavnim gradom završio obiđavši Sabornu crkvu, Begovu džamiju, Sinagogu i Katedralu.

Primopredaja vatrogasnih vozila Grada Beča, Beč (Republika Austrija), 1.-3.10.2020.

Profesionalna vatrogasna brigada Grada Beča uručila je tri vatrogasna vozila Profesionalnoj vatrogasnoj brigadi Kantona Sarajevo u Beču 2.10.2020. godine. Primopredaja je izvršena u prisustvu gradonačelnika Beča Michaela Ludwiga, gradonačelnika Sarajeva Abdulaha Skake, ambasadora BiH u Republici Austriji Kemala Kozarića, člana Vlade Pokrajine Beča, Gradskog senata i Privrednog vijeća Petera Hankea i direktora Civilne zaštite Kantona Sarajevo Jasmina Terovića.

Ova vozila predstavljaju jednu u nizu donacija koje je Grad Beč u proteklih deset godina poklonio sarajevskim vatrogascima, ali i nastavak višegodišnje saradnje gradova prijatelja.

Službena posjeta Gradu Mannheimu (SR Njemačka), 12.-13.10.2020.

Na poziv gradonačelnika Mannheima, delegacija Grada Sarajeva koju su činili gradonačelnik Abdulah Skaka, direktor JP Sarajevo d.o.o. Ensar Eminović, šef Odjeljenja za međunarodnu saradnju Zinaida Čengić, i šef protokola Grada Sarajeva Azra Šišman, boravila je u tom njemačkom gradu od 12. do 13.10.2020. godine.

Ostvarivanje saradnje sa Gradom Mannheimom je od izuzetnog značaja za Grad Sarajevo, budući da je Mannheim među vodećim njemačkim gradovima koji su posvećeni implementaciji globalnih ciljeva održivog razvoja do 2030. godine i uključen je u njihovu realizaciju na različite načine.

Nadležne službe Grada Mannheima su kroz veoma sadržajnu prezentaciju upoznale delegaciju Grada Sarajeva sa održivom opskrbom energijom i lokalizacijom ciljeva održivog razvoja u Mannheimu „Mannheim 2030“. Grad Mannheim ima značajne investicije u pogledu utopljanja objekata, zaštite od aerozagađenja i proizvodnje zelene energije, tako da bi pomoć tog grada BiH mogla biti vidljiva kroz zajedničke projekte i korištenje pretpripravnih fondova EU.

Nakon prezentacije, gradonačelnik Skaka se sastao sa gradonačelnikom Peterom Kurzom i njegovim saradnicima, sa kojima je razgovarao o mogućim vidovima saradnje. Sagovornici su prepoznali obostrani interes dvaju gradova za intenziviranje i uspostavljanje specifičnih međusobnih odnosa u područjima od interesa za građane dva grada.

Gradonačelnici Sarajeva i Mannheima su potpisali „Memorandum o razumijevanju“ kojim su se složili da će razvijati međusobnu saradnju, razmjenjivati informacije i iskustva na svim poljima djelovanja u okviru ovlasti gradskih uprava i od interesa za građane dva grada, posebno u sljedećim područjima: Prijava na EU i druge međunarodne fondove; Održivi razvoj - UN Agenda - Ciljevi održivog razvoja 2030; Klimatske promjene; Smart City; Urbana transformacija; Inovacije.

Sastancima je prisustvovao i Generalni konzul BiH u Stuttgartu Began Muhić koji je govorio o energetske sektoru kao jednom od najsnažnijih privrednih sektora BiH sa dugom tradicijom i ogromnim potencijalima i mogućnostima za daljnji razvoj i ulaganja. Podsjetio je da je Sporazumom o stabilizaciji i pridruživanju propisano da će saradnja naše zemlje i EU biti usmjerena na prioritete pravne stečevine evropske zajednice u oblasti energetike. Ta saradnja će biti zasnovana na Ugovoru o osnivanju energetske zajednice, te će se razvijati sa ciljem postepenog integrisanja BiH u evropska energetska tržišta, kao i rješavanju brojnih ekoloških prioriteta u cilju zaštite životne sredine bh. građana, za šta je veoma bitna podrška njemačke strane.

Službena posjeta Gradu Magdeburgu (SR Njemačka), 13.-15.10.2020.

Na poziv gradonačelnika Magdeburga, gradonačelnik Sarajeva Abdulah Skaka sa delegacijom koju su činili direktor JP Sarajevo d.o.o. Ensar Eminović, šef Odjeljenja za međunarodnu saradnju Zinaida Čengiđ i šef protokola Grada Sarajeva Azra Šišman, boravio je u tom njemačkom gradu od 13. do 15.10.2020. godine.

Gradonačelnik Sarajeva je prisustvovao 8. Ceremoniji dodjele Nagrade Grada Magdeburga „Car Otto Veliki“ 2020, koja je u organizaciji Emperor Otto Cultural Foundation održana 14. oktobra. U okviru svečanosti, nagrada „Car Otto Veliki“ (koja se dodjeljuje istaknutim ličnostima za promociju evropskih ideja i posvećenost dijalogu, miru i razumijevanju) dodijeljena je predsjedniku Rumunije Klausu Werneru Iohannisu.

Tokom boravka, gradonačelnik Skaka se u Gradskoj vijećnici upisao u „Zlatnu knjigu Grada Magdeburga“, te se sastao sa gradonačelnikom Lutzom Trümperom sa kojim je razgovarao o nastavku saradnje između Sarajeva i Magdeburga, koji imaju uspostavljene pobratimske odnose od 1977. godine. Razmijenjene su informacije o trenutnoj epidemiološkoj situaciji te mjerama koje se primjenjuju u oba grada u cilju sprečavanja širenja pandemije koronavirusa.

Potom je održana simbolična primopredaja vozila hitne pomoći koje je Ured za suzbijanje požara i katastrofa iz Magdeburga, na inicijativu gradonačelnika Sarajeva upućenu gradonačelniku Magdeburga, odlučio donirati građanima Sarajeva u cilju poboljšanja zdravstvenih usluga, naročito u okviru borbe protiv koronavirusa.

Delegacija Grada Sarajeva se sastala i sa pomoćnicom gradonačelnika za socijalu, mlade i zdravlje Simone Borris, pomoćnikom gradonačelnika za finansije Klausom Zimmermannom i pomoćnicom gradonačelnika za kulturu Reginom Stieler-Hinz. Tokom susreta sa pomoćnicom gradonačelnika za kulturu razgovarano je o obilježavanju 45. godišnjice pobratimskih odnosa između Sarajeva i Magdeburga 2022. godine. Sastanku su prisustvovali i predstavnici Udruženja Herbstsalon e.V. koji će zajedno sa umjetnicima iz Sarajeva organizirati izložbu.

Ambasadorica BiH u SR Njemačkoj Jadranka Winbow prisustvovala je prijemu kod gradonačelnika Magdeburga, primopredaji vozila hitne pomoći i sastanku sa pomoćnicom gradonačelnika za kulturu Reginom Stieler-Hinz.

Zvanična primopredaja doniranog vozila hitne pomoći između šefa Kabineta gradonačelnika Magdeburga i službenika administracije Grada Sarajeva, izvršena je u Magdeburgu 12.11.2020. godine, a ceremoniji je prisustvovao i predstavnik Ambasade BiH u Berlinu.

Odlukom Gradskog vijeća Grada Sarajeva, usvojenom na 45. sjednici održanoj 30.12.2020. godine, Grad Sarajevo je kombi vozilo marke Mercedes-Benz poklonio JU Zavod za hitnu medicinsku pomoć Kantona Sarajevo, u svrhu bobe protiv COVID-19.

Službena posjeta delegacije Grada Burse (Republika Turska), Sarajevo, 16.-17.10.2020.

Delegacija turskog pobratimskog Grada Burse koju je predvodio gradonačelnik Alinur Aktaş, boravila je u Sarajevu 16. i 17.10.2020. godine. Gradonačelnici Alinur Aktaş i Abdulah Skaka su na prijemu u Vijećnici razgovarali o dosadašnjoj i nastavku saradnje gradova pobratima koji imaju, kako je istaknuto, komplementarne prednosti i ogroman potencijal za saradnju na obostranu korist njihovih građana.

Gradonačelnik Skaka je istakao da Grad Bursa spada u jedne od najstarijih pobratimskih gradova Sarajeva, sa kojim prijateljstvo traje već 41 godinu, a da je ponovnim potpisivanjem Sporazuma o saradnju u februaru 2020. godine, potvrđeno zajedničko opredjeljenje za nastavak kvalitetne saradnje.

Grad Bursa jedan od najvećih donatora kad je u pitanju obnova starih građevina u Gradu Sarajevu, posebno na Baščaršiji, a Grad Sarajevo je izgradio repliku Sebilja u Gradu Bursi.

Gradonačelnik Skaka kazao je kako su „Dani grada Sarajeva u Bursi” i „Dani grada Burse u Sarajevu” koji su trebali biti organizirani u maju i junu 2020. godine, otkazani zbog pandemije koronavirusa.

Naglasio je da će administracija Grada Sarajeva nastaviti sa jačanjem veza sa pobratimskim gradovima sa fokusom na gradove u Turskoj, a među njima i najstarijim gradom Bursom.

Gradonačelnik Burse izrazio je duboku zahvalnost gradonačelniku Sarajeva na srdačnoj dobrodošlici, tradicionalno dobrim odnosima i zajedničkim projektima na kojima uspješno rade. Istakao je kako u dvodnevnoj posjeti Sarajevu boravi zajedno sa predstavnicima poslovnog svijeta iz Turske, kako bi u Sarajevu uspostavili nove poslovne veze. Izrazio je želju za nastavkom saradnje, te da se što više uvežu industrijalci i poslovni ljude iz Burse sa BiH, prvenstveno sa Sarajevom i da se na taj način formira jedna poslovna infrastruktura za daljnju saradnju.

Prisutnim medijima poručio je kako u narednom periodu Bursa ima u planu da realizira edukacije za žene o kaligrafiji i ebru slikanju.

Nakon prijema u Vijećnici i razgovora o nastavku saradnje i novim projektima, čelnici dva grada, na inicijativu gradonačelnika Burse, obišli su Crvenu tabiju i posjetili mezar prvog predsjednika Bosne i Hercegovine Alije Izetbegovića.

Grad Bursa je izrazio spremnost da učestvuje u projektu Crvene tabije čijom revitalizacijom bi se vratio autentičan izgled još jednog turističkog resursa bh. prijestolnice. To je bio povod da delegacija obiđe ovaj lokalitet, ali i pet stoljeća staru atrakciju Firuz-begovog hamama u srcu Baščaršije, za koju je Grad Sarajevo pokrenuo akciju otkupa, a kako bi u narednom periodu bila napravljena nova turistička lokacija.

Poruka podrške Beču osvjetljenjem sarajevske Vijećnice, 4.11.2020.

Osvjetljenjem Vijećnice u bojama zastave Republike Austrije 4.11.2020. godine, Grad Sarajevo je zajedno sa svojim građanima želio iskazati saosjećanje i solidarnost sa porodicama ubijenih i povrijeđenih u terorističkom napadu u Beču, koji se desio 2.11.2020. godine. Gradonačelnik Skaka je poručio da samo odlučnost za zajedničku borbu protiv terorizma, može da zaštiti i odbrani slobodu, demokratiju, kulturne i civilizacijske vrijednosti.

Online sastanak gradonačelnika Sarajeva i Konye, 10.11.2020.

Na inicijativu gradonačelnika pobratimskog Grada Konye, gradonačelnik Sarajeva Abdulah Skaka i gradonačelnik Konye Uğur İbrahim Altay, održali su zoom sastanak 10.11.2020. godine. Tokom razgovora, g. Altay je pružio podršku g. Skaki na predstojećim lokalnim izborima, te izrazio nadu da će se u boljim okolnostima sresti u Sarajevu nakon izbora kao gradonačelnici dva grada.

Partnerski prijateljski odnosi Sarajeva i Konye traju još od 2007. godine na obostrano zadovoljstvo, a u razgovoru je istaknuto kako podrška u trenutnim uslovima pandemije koronavirusa pokazuje da su uspostavljene veze snažne, a međusobno uvažavanje i saradnja neupitna.

Grad Sarajevo je u toku četiri godine mandata gradonačelnika Skake realizirao brojne projekte, od društvenih, sportskih, kulturnih manifestacija do kapitalnih infrastrukturnih. Na svjetskom nivou promovirao je prijestolnicu i pokazao spremnost za aktivan rad i zalaganje, što je i prepoznao gradonačelnik Konye izrazivši mu želju za uspjeh u daljnjem radu.

Donacija Grada Innsbrucka – vozilo hitne pomoći, 19.11.2020.

Na inicijativu gradonačelnika Sarajeva, Grad Innsbruck je donirao vozilo hitne pomoći Gradu Sarajevu Ugovorom o donaciji, zaključenim 19.11.2020. godine, između Grada Innsbrucka, kojeg je zastupao gradonačelnik Georg Willi, i Grada Sarajeva kojeg je zastupao gradonačelnik Abdulah Skaka.

Naime, ugovorne strane su vezane dugogodišnjim prijateljstvom od 1980. godine, putem pobratimskih veza. Tokom niza godina, realiziran je širok spektar zajedničkih projekata, a u tom duhu i u cilju potvrde ovog partnerstva, Grad Innsbruck je donirao vozilo hitne pomoći Gradu Sarajevu, u svrhu bobe protiv COVID-19.

Odlukom Gradskog vijeća Grada Sarajeva, usvojenom na 45. sjednici održanoj 30.12.2020. godine, Grad Sarajevo će korišteno vozilo, marke Volkswagen, model Transporter, pokloniti JU Dom zdravlja Kantona Sarajevo, u svrhu bobe protiv COVID-19.

Službena posjeta delegacije Grada Sarajeva Dubaiju (UAE), 18.-23.12.2020.

Na poziv Odjela za ekonomski razvoj Vlade Dubaija, delegacija Grada Sarajeva koju su činili gradonačelnik Abdulah Skaka, sekretar Gradske uprave Maja Hadžihalilović, pravobranilac Grada Sarajeva Sanjin Smajlović, pomoćnik gradonačelnika za urbano planiranje, investicijske, stambene i komunalne poslove Nedim Tvrtković, i direktor JP „Sarajevo“ d.o.o. Ensar Eminović, boravila je u Dubaiju (Ujedinjeni Arapski Emirati) od 19. do 23.12.2020. godine.

Dana 19.12.2020. godine delegacija se sastala sa Ambasadorom Bosne i Hercegovine u UAE sa kojim je razgovarala o uspostavljanju ekonomske saradnje između Grada Sarajeva i Grada Dubaija, te unaprjeđenju turističke ponude grada Sarajeva prema UAE.

Prilikom susreta sa zamjenikom ministra za ekonomsku saradnju u Vladi Dubaija, razgovarano je o daljnjim aktivnostima u cilju uspostavljanja ekonomske saradnje između Sarajeva i Dubaija, kao i o formiranju „Vijeća za ekonomsku saradnju“ kojim bi se iskazala predanost jačanju veza između dva grada i formalizaciji bilateralnog partnerstva u svrhu uspostavljanja saradnje u ekonomskom, kulturnom i društvenom sektoru.

III. MEĐUNARODNI SKUPOVI

Međunarodni seminar za muzičke pedagoge, umjetnike, studente i učenike, Dubrovnik, 10.-15.1.2020.

Međunarodni seminar za muzičke pedagoge, umjetnike, studente i učenike održan je u organizaciji Udruženja muzičkih i baletnih pedagoga BiH u Dubrovniku od 10. do 15.1.2020. godine. Seminaru su prisustvovali zamjenik gradonačelnika Ivica Šarić i pomoćnica gradonačelnika za obrazovanje, kulturu, sport i mlade Amina Deljković, predavači su bili istaknuti domaći i svjetski pedagozi i umjetnici iz BiH, Slovenije, Srbije, Hrvatske, Austrije i Njemačke, dok su muzičari svih smjerova svaku večer organizirali koncert sudionika seminara, uz zabavni program.

Konferencija „Digitalna transformacija u BiH: uprava na klik od građana“, Sarajevo, 12.2.2020.

Konferencija „Digitalna transformacija u BiH: uprava na klik od građana“, održana je u organizaciji Britanske ambasade u BiH, u saradnji sa UNDP BiH, u Dječjoj kući u Sarajevu 12.2.2020. godine.

Konferencija je održana u okviru projekta „Podrška reformama e-uprave i digitalizacije usluga u BiH“ koji se implementira posredstvom Fonda za dobru upravu Vlade Velike Britanije, u saradnji sa UNDP-ovim portfolijem digitalne transformacije i pametnih gradova.

Konferencija je organizovana sa namjerom doprinosa oblasti koja je prepoznata kao prioritet i preduslov za veću efikasnost uprave i istovremeno brže i pristupačnije javne usluge – digitalnoj transformaciji javnog sektora. Velika Britanija i UNDP u BiH aktivno učestvuju u ovoj oblasti, kroz podršku na strateškom i programskom nivou, a sa ciljem stavljanja u funkciju potencijala savremenih tehnologija razvoju društva.

U ime Grada Sarajeva događaju je prisustvovao Ammar Makić, šef Odsjeka za informatičke poslove, koji je učestvovao na panel diskusiji pod nazivom „Gradovi budućnosti. Talentirani ljudi, inovacije, tehnologija i partnerstva za razvoj inkluzivnih gradova ugodnih za život“.

Promocija Sarajeva – grada filma UNESCO-a, Berlin (SR Njemačka), 23.-25.2.2020.

Povodom održavanja 70. međunarodnog filmskog festivala Brelinale, gradonačelnik Abdulah Skaka boravio je u Berlinu od 23. do 25.2.2020. godine. U okviru ovog događaja održan je prijem povodom dodjele statusa grada filma UNESCO-a Sarajevu, koji je prilika za promociju i razvoj grada i povezivanje sa drugim kreativnim gradovima UNESCO-a.

Prijemu su prisustvovali brojni gosti, uključujući predstavnike međunarodnih filmskih festivala, filmske radnike i autore iz regije i svijeta, kao i predstavnike gradova filma UNESCO-a Rima i Potsdama. Prisutne su pozdravili gradonačelnik Sarajeva, direktor Sarajevo Film Festivala Mirsad Purivatra i ambasadorica BiH u Njemačkoj Jadranka Winbow.

Delegacija Sarajeva se sastala sa umjetničkim direktorom Berlinalea Carlom Chatrianom, te održala sastanak sa ambasadoricom Winbow i direktorom Sarajevo Film Festivala Purivatrom sa kojima je razgovarano o projektima u oblasti kulture.

Na poziv Grada Potsdama, saradnica na projektima iz Službe za evropske integracije i EU fondove Lejla Bešlagić, koja je u Berlinu boravila od 26. do 28. februara, zajedno sa predstavnicima Obala Art Centra Sarajevo - Magdalenom Popović i Jovanom Marjanovićem, posjetila je Filmski Muzej u Potsdamu, Studio Babelsberg, Filmski Park te Univerzitet filma. Tom prilikom dogovorena je saradnja sa Univerzitetom filma, te potencijalni mentoring program iz oblasti "specijalnih efekata" i „vještačke inteligencije”.

(Sarajevo je dobio status grada filma UNESCO-a u oktobru 2019. i postao članom globalne mreže kreativnih gradova UNESCO-a, čiji je cilj unaprjeđenje međunarodne saradnje gradova u skladu sa UNESCO-ovom globalnom misijom održivog urbanog razvoja i kulturne različitosti. Status grada filma UNESCO-a Sarajevu je dodijeljen kao priznanje za dosadašnja postignuća u kreativnoj oblasti filma, kao i opredijeljenosti grada da film i kreativnost stavi u središte svojih budućih razvojnih strategija).

U pratnji gradonačelnika bila je i šefica Kabineta gradonačelnika Erna Čolić.

Radionica u cilju realizacije Plana održive urbane mobilnosti u Sarajevu, Sarajevo, 27.2.2020.

U cilju realizacije aktivnosti vezanih za izradu Plana održive urbane mobilnosti za Kanton Sarajevo i Grad Sarajevo, delegacija Grada Sarajeva predvođena zamjenikom gradonačelnika Milanom Trivićem, prisustvovala je radionici u okviru koje su predstavljeni indikatori i ključne strategije projekta, održanoj u Hotelu Holiday 27.2.2020. godine.

Mjere i aktivnosti Plana održive urbane mobilnosti Sarajeva trebaju da se fokusiraju na strateške pravce do 2030. godine – izgradnja sistema koji će omogućiti građanima očekivanu mobilnost i pristupačnost, uspješno dinamično okruženje koje promovira održivi razvoj i zaštitu okoliša.

Akcije trebaju da rezultiraju zdravijim i sigurnijim okruženjem za sve stanovnike i učesnike u saobraćajno – transportnom sistemu, stavljajući akcenat na nemotorizirana kretanja i prijevoze, pješake, bicikliste, te mala sredstva elektromobilnosti. Također, cilj je kreiranje pretpostavki za omogućavanje sigurnog i čistog javnog gradskog prijevoza kao i pogodnosti za osobe sa invaliditetom i smanjenom pokretljivošću.

Fokus projekta je na izgradnji kapaciteta i tehničkoj podršci glavnim gradovima, kao i na udruživanje općina u jugoistočnoj Evropi da postignu održiv i brz transportni sistem, te tako postanu gradovi koji će biti zdraviji, sigurniji i prosperitetniji.

Projekat je dio Otvorenog regionalnog fonda za jugoistočnu Evropu – energetska efikasnost (ORF-EE) implementiranog od strane GIZ-a u ime Njemačke vlade.

6. Međunarodni Dan joge u Bosni i Hercegovini, 21.6.2020.

Tradicionalni „Međunarodni dan joge“ obilježen je 21. juna u organizaciji Ambasade Republike Indije za BiH sa sjedištem u Budimpešti. Za 6. Međunarodni dan joge na temu „Joga od kuće“ indijska ambasada je organizirala niz događaja kojim se uz praćenje mjera socijalne distance nastojala povezati sa što većim brojem ljudi u BiH. Ambasada je saradivala sa istaknutim joga učiteljima iz većih gradova BiH, uključujući Sarajevo, Banja Luku i Mostar, kako bi učestvovali u živom prijenosu standardiziranog protokola joga vježbi iz svojih studija. Program je putem live streaminga vodila učiteljica joge iz Amrita Sher-Gil kulturnog centra u Mađarskoj sa Trga heroja u Budimpešti.

Ovim povodom, zamjenik gradonačelnika Milan Trivić snimio je video poruku u kojoj govori o značaju ove drevne indijske vještine.

Organizacija 5. Foruma glavnih gradova Centralne i Istočne Evrope i NR Kine

Gradonačelnici Sarajeva i Beijinga, u svojstvu organizatora i suorganizatora 5. Foruma gradonačelnika glavnih gradova Centralne i Istočne Evrope (CEEC) i NR Kine 17+1, koji se trebao održati u Sarajevu u septembru 2020. godine, uputili su 20.7.2020. godine zajedničko pismo kojim su gradove članove inicijative 17+1 obavijestili o pomjeranju termina održavanja Foruma za 2021. godinu, zbog trenutne epidemiološke situacije.

Dana 17.12.2020. godine održan je online sastanak Odjeljenja za međunarodnu saradnju Grada Sarajeva, Ureda za vanjske poslove Grada Beijinga i kineske ambasade u Sarajevu, tokom kojeg su razmatrani tehnički detalji organizacije 5. Foruma. Predloženo je da se Forum sastoji od svečanog prijema, ceremonije otvorenja, plenarne sjednice gdje će glavna tema biti „Održivi razvoj gradova“, zatim paralelnih sjednica na teme „Zdravi gradovi“, „Kulturne i kreativne industrije“ i „Kulturni turizam“, potom bi slijedilo donošenje zaključaka i usvajanje Zajedničke deklaracije.

U okviru događaja održat će se i poslovni forum koji će se sastojati od okruglog stola privrednih komora i B2B sastanaka. U okviru teme obrazovanja, održat će se okrugli stolovi o turističkom obrazovanju, obrazovanju iz srednjoevropskih i istočnoevropskih jezika, te o arhitektonskom obrazovanju i „otpornim gradovima“.

Također, obzirom da se radi o jubilarnom petom Forumu, posebna pažnja će se posvetiti i kulturnom događaju pod nazivom „Šarmantni Bejing“, gdje će se kroz slike, tekstove i videozapise predstaviti pregled petogodišnjeg razvoja Foruma i saradnje između Beijinga i glavnih gradova Centralne i Istočne Evrope.

Regionalni projekat „Održiva urbana mobilnost u zemljama Jugoistočne Evrope II“, Sarajevo, 22.7.2020.

Grad Sarajevo i Kanton Sarajevo su partneri u regionalnom projektu „Održiva urbana mobilnost u zemljama Jugoistočne Evrope – Gradovi Jugoistočne Evrope zajedno za održiv i energetske efikasan transport II“. Projekat je dio Otvorenog regionalnog fonda za Jugoistočnu Evropu - energetska efikasnost (ORF-EE), finansira ga njemačko Ministarstvo za ekonomsku saradnju i razvoj, a implementira GIZ.

Ključni fokus regionalnog projekta je jačanje i širenje saradnje unutar i između mreža koje djeluju transnacionalno, tj. Mreže energetske efikasnosti glavnih gradova i gradova i Mreže udruženja općina iz Jugoistočne Evrope.

Grad Sarajevo, Ministarstvo saobraćaja Kantona Sarajevo i GIZ, potpisali su 3.4.2019. godine „Memorandum o razumijevanju“ u svrhu razvoja „Plana održive urbane mobilnosti (SUMP)“ za centralna urbana područja Sarajeva. SUMP je strateški plan dizajniran kako bi zadovoljio potrebe za mobilnošću ljudi i preduzeća u gradovima i njihovom okruženju radi bolje kvalitete života.

Novi pristupi planiranju urbane mobilnosti uključuju izradu strategije koja može potaknuti prelazak na čistije i održivije načine transporta, kao što su pješaćenje, biciklizam, javni prijevoz, nove

obrasce korištenja i vlastitog automobila, korištenje novih tehnologija, te usvajanje novih koncepata održive gradske logistike.

Plan održive urbane mobilnosti osmišljen i razvijen je tako da bude strateško usmjerenje Kantona Sarajevo i Grada Sarajevo u smislu iskoraka ka savremenim konceptima urbane mobilnosti za period 2019.-2025., i predstavlja prvi integralni plan ove vrste u Kantonu Sarajevo i Gradu Sarajevo.

Predstavljanje finalnog nacrtu dokumenta održano je online 22.7.2020. godine, a učesnici su bili predstavnici vladinih institucija, lokalnih zajednica, nevladinog sektora, akademske zajednice, udruženja građana i GIZ-a ORF-EE. Na online sastanku je učestvovao zamjenik gradonačelnika Milan Trivić i član koordinacione grupe za izradu SUMP-a ispred Grada Sarajeva Nejra Selimović.

Okrugli stol gradonačelnika „Bridge for Cities 2020“, 5.10.2020.

Organizacija Ujedinjenih nacija za industrijski razvoj (UNIDO) i Grad Beč organizirali su online konferenciju „Bridge for Cities 2020“ koja je održana 5.10.2020. godine.

Učesnici su govorili o učinkovitim institucionalnim okvirima i politikama, uključujući zelenu nabavku i javna-privatna partnerstva za iskorištavanje potencijala dioničara za pojačano ozelenjavanje gradskih ekonomija u postpandemijskom svijetu. Također, predstavljeni su i primjeri planova ekonomskog oporavka gradova, ističući uspješan ko-dizajn i sinergije s firmama koje implementiraju zelene tehnologije.

U ime Grada Sarajeva učešće je uzeo zamjenik gradonačelnika Milan Trivić, u okviru sesije na temu “Zeleni ekonomski oporavak: Promišljanje modela urbanog razvoja za održive gradove”.

„Forum gradonačelnika“, Ženeva (Švicarska Konfederacija), 6.10.2020.

Na poziv Ekonomske komisije Ujedinjenih nacija za Evropu (UNECE), gradonačelnik Sarajeva Abdulah Skaka, učestvovao je u radu „Forum gradonačelnika“ koji je održan u Palači nacija, u Ženevi, 6.10.2020. godine.

Gradonačelnici brojnih evropskih gradova su predstavili svoja iskustva i izazove sa kojima su se suočavali tokom pandemije COVID-19.

Gospodin Skaka je imao izlaganje na temu „Djelovanje grada u cilju otpornije budućnosti. Jačanje spremnosti lokalnih vlada, odgovor na vanredne situacije i utjecaj katastrofa i klimatskih promjena“, koja je bila u fokusu „Forum gradonačelnika“ 2020. godine.

Pored gradonačelnika Sarajeva, učešće u radu ovog Forum uzeli su brojni gradonačelnici evropskih gradova, među kojima gradonačelnik Ženeve, Atine, Beograda, Maribora, Novog Mesta itd.

5. Međunarodna olimpijada metropola, 16.-22.12.2020.

5. Međunarodna olimpijada Metropola održana je u organizaciji Vlade Moskve, u online formatu, od 16. do 22.12.2020. godine. Ovaj događaj svake godine okuplja timove školske djece iz različitih gradova svijeta u takmičenju u opće obrazovnim disciplinama kao što su matematika, informatika, hemija i fizika. Ove godine učešće je uzelo preko 30 timova.

Grad Sarajevo na čelu sa gradonačelnikom Abdulahom Skakom, podržao je učešće šest sarajevskih učenika koji su se takmičili u matematici, informatici i fizici. Radi se o najboljim učenicima Druge gimnazije Sarajevo i Prve bošnjačke gimnazije Sarajevo, odnosno učenicima olimpijcima i osvajačima mnogobrojnih medalja na domaćim i međunarodnim takmičenjima iz matematike, informatike i fizike.

Svih šest učenika osvojilo je medalje, i to dvije srebrene i četiri brončane. Lideri tima bili su profesori matematike Amar Bašić i Emir Kalajdžija iz Druge gimnazije Sarajevo, studentica fizike na Prirodno-matematičkom fakultetu Majra Šišić i profesor informatike Adnan Šalaka iz Druge gimnazije Sarajevo.

Međunarodna olimpijada Metropol je važan korak u realizaciji globalne misije razvoja obrazovanja, i ima pozitivan utjecaj na razvoj partnerstva između gradova.

IV. SARADNJA S DIPLOMATSKO-KONZULARNIM PREDSTAVNIŠTVIMA

Press konferencija – 3. Diplomatski zimski bazar 2019 (DWB), 20.2.2020.

Press konferencija Organizacionog odbora 3. Diplomatskog zimskog bazara 2019 (DWB) održana je u Sarajevu u EU Info centru 20.2.2020. godine. Organizatori Diplomatskog zimskog bazara su istakli zadovoljstvo što ovaj događaj svake godine okuplja sve veći broj ambasada, te što napreduje i premašuje sakupljeni iznos novca. Tokom Diplomatskog zimskog bazara održanog 2019. godine prikupljeno je rekordnih 249.000,00 konvertibilnih maraka (KM), koje su tokom press konferencije dodijeljene zaslužnim udruženjima koja rade sa djecom i mladima u BiH.

Nažalost, ovaj najveći humanitarni događaj koji međunarodna zajednica organizira u BiH, zbog pandemije koronavirusa nije održan krajem 2020. godine kako je bilo predviđeno. Međutim, organizatori su bili odlučni da održe duh Bazara u novom obliku pa su započeli humanitarnu akciju, pod svojim tradicionalnim motom „Svaka marka je važna“, u trajanju od 23.12.2020. godine do 15.1.2021. godine. Organizatori su predani istom cilju, podršci djeci sa poteškoćama u razvoju i onima koji odrastaju bez roditeljskog staranja, te mladim ljudima kojima je pomoć potrebna.

Prijem povodom Nacionalnog dana Japana, Sarajevo, 20.2.2020.

Prijemu koji je ambasador Japana u BiH Hideyuki Sakamoto upriličio 20.2.2020. godine povodom Nacionalnog dana Japana koji se slavi kao rođendan japanskog cara Naruhita, prisustvovao je zamjenik gradonačelnika Ivica Šarić.

Brojnim zvanicama, diplomatskom koru u BiH, političkim predstavnicima BiH, predstavnicima javnih i kulturnih institucija koje su prisustvovala prijemu, ambasador je ukazao na dobre bilateralne odnose BiH i Japana, koji se razvijaju na više polja. Pored stalne podrške obnovi škola, domova zdravlja i sektoru deminiranja, koji uključuje ukupno 11 projekata u 2019. godini, Vlada Japana je donirala neophodnu opremu i vozila za posebnu namjenu za vodosnabdijevanje, setove agrometeoroloških sistema za posmatranje za civilnu zaštitu, te patrolna vozila za autoceste.

Ambasador je izrazio uvjerenje da će te donacije poboljšati kapacitet i efektivnost rada javnih službi, te je dodao da su novi projekti tehničke pomoći također pokrenuti u sektoru javnog transporta sa Vladom Kantona Sarajevo, kao i mentorske usluge za mala i srednja preduzeća, a povećan je i obim saradnje sa Univerzitetom u Sarajevu.

Sakamoto je istakao da u ekonomskom sektoru prate pozitivne pomake u proizvodnji i IT sektoru u BiH, kao i ostalim državama zapadnog Balkana, te izrazio nadu da će Vlada poduzeti nove mjere u cilju povlačenja stranih investicija. Naglasio je da su politička stabilnost i funkcionalna vlada najbitniji uvjeti za povlačenje stranih investitora.

Također je spomenuo i održavanje Ljetnjih olimpijskih i paraolimpijskih igara u Tokiju 2020. godine, te poželio uspjeh bh. sportistima koji su se kvalificirali za te igre.

Promocija knjige autorice Sariyye Muslumgızı, Sarajevo, 21.2.2020.

Uz organizacijsku podršku Ambasade Republike Azerbejdžan, u povodu 28. godišnjice genocida u Khojalju održana je promocija knjige autorice Sariyye Muslumgızı „Oni neće nikada odrasti“.

Događaju koji je održan na Internacionalnom univerzitetu u Sarajevu (IUS) 21.2.2020. godine, prisustvovali su akademici, ugledni međunarodni pravni stručnjaci, javne ličnosti, članovi parlamenata, predstavnici nevladinih organizacija, diplomatskog kora i medija iz BiH i Azerbejdžana, a u ime Grada Sarajeva prisustvovala je stručna saradnica u Odjeljenju za međunarodnu saradnju i protokol Azra Šišman.

Oproštajni prijem rezidentne koordinatorice UN-a u BiH, Sarajevo, 24.2.2020.

Oproštajnom prijemu koji je povodom završetka mandata rezidentne koordinatorice Ujedinjenih nacija za BiH Sezin Sinanoglu, održan u UN House 24.2.2020. godine, prisustvovao je Ensar Eminović, direktor JP. Sarajevo d.o.o.

Gđa Sinanoglu je tokom svog djelovanja značajno doprinijela dobroj institucionalnoj saradnji i unaprjeđenju partnerstva između BiH i Ujedinjenih nacija.

Međunarodni umjetnički projekat „Tikkun olam – popravljane svijeta”, Sarajevo, 4.3.2020.

Međunarodni umjetnički projekat „Tikkun olam – popravljane svijeta kroz djelovanje pojedinca”, održan je u Vijećnici 4.3.2020. godine u organizaciji umjetničke radionice Elkana iz Hrvatske, uz podršku ambasade Republike Hrvatske u BiH, Grada Sarajeva i sarajevske Vijećnice.

Radi se o projektu koji je okupio umjetnike iz Hrvatske, Izraela, BiH i Sjeverne Makedonije, odnosno zemalja u kojima je planirano predstaviti ga kao izložbu, od februara do aprila 2020. Projekt je organiziran u godini kada svijet obilježava 75. godišnjicu oslobađanja Auschwitz, te 25. godišnjicu genocida u Srebrenici. Cilj projekta je poticanje na zajedništvo i nadilaženje podjela, te prenošenje poruke koncepta Tikkun olam, koja govori o dužnosti svakog pojedinca da aktivnim djelovanjem popravlja svijet.

Učešće u javnoj raspravi uzeli su historičar i savjetnik za religiju i kulturu Židovske zajednice u BiH Eli Tauber, profesor na Fakultetu političkih znanosti u Sarajevu Senadin Lavić, direktor Umjetničke galerije BiH Strajo Krsmanović, profesor na Franjevačkoj teologiji u Sarajevu fra dr. Mile Babić te autor Tikkun olam projekta Feđa Aaron Bučić.

Po završetku javne rasprave, predsjednik Židovske zajednice u BiH Jakob Finci otvorio je izložbu umjetnika Feđe Aarona Bučića. Izložbena postavka sastojala se od dva dijela, gdje je prvi dio govorio o stvaranju Čovjeka, a drugi o Čovjekovom stvaranju, i trajala je dvije sedmice.

Događaju je prisustvovao je zamjenik gradonačelnika Milan Trivić.

Sastanak sa ambasadorom Kraljevine Velike Britanije, Sarajevo, 4.3.2020.

Na zahtjev Ambasade Kraljevine Velike Britanije u BiH, gradonačelnik Sarajeva Abdulah Skaka održao je 4.3.2020. godine sastanak sa ambasadorom Matthewom Fieldom i savjetnikom za upravu i program menadžerom Dejanom Buhom.

Tema sastanka bila je posjeta Njegovog kraljevskog visočanstva princa od Velsa – princa Charlesa Bosni i Hercegovini 17. i 18.3.2020. godine, kada je planirana posjeta Sarajevu i Memorijalnom centru Potočari u Srebrenici. Konstatovano je da je posjeta princa od Velsa pokazatelj sve veće posvećenosti Ujedinjenog Kraljevstva BiH i regionu zapadnog Balkana, kao i dugogodišnje lične predanosti Njegovog visočanstva pomirenju na zapadnom Balkanu.

Princ Charles je posljednji put posjetio BiH 2007. godine, a 2016. godine posjetio je druge zemlje zapadnog Balkana.

Posjeta koja je bila tema sastanka nije realizirana zbog pandemije COVID-19.

Sarajevska Vijećnica u bojama zastave Republike Italije, 14.3.2020.

U znak podrške Republici Italiji u borbi protiv pandemije COVID-19, Vijećnica je 14.3.2020. godine osvjetljena bojama italijanske zastave, a te fotografije vidjeli su milioni Italijana.

Gradonačelnik Sarajeva Abdulah Skaka i italijanski ambasador u BiH Nicola Minasi prisustvovali su ovom činu te zajednički poslali snažnu poruku saradnje, zajedništva i podrške svima u borbi protiv ovog velikog izazova. Gradonačelnik je poručio da BiH, iako i sama suočena sa širenjem virusa i mjerama prevencije, šalje poruku prijateljima iz Italije da je uz njih kao što su oni bili uz BiH kada je bilo najteže.

Uručenje iftarskih paketa kralja Saudijske Arabije, Sarajevo, 30.4.2020.

Kulturni centar „Kralj Fahd“ je 30.4.2020. godine organizovao svečanost uručenja iftarskih paketa kralja Saudijske Arabije Salman bin Abdulaziz Al Sauda, koji je pokrenuo ovaj projekat. Prisutnim se obratio ambasador Kraljevine Saudijske Arabije u BiH Hani bin Abdullah Mominah, koji je istakao dobru saradnju BiH i Kraljevine Saudijske Arabije, te uputio iskrene čestitke bh. građanima povodom mjeseca Ramazana.

Uručenju humanitarnih iftarskih paketa prisustvovao je gradonačelnik Abdulah Skaka, a svečanosti su, između ostalih, prisustvovali i ministrica za rad, socijalnu politiku, raseljena lica i izbjeglice KS Jasna Agić, direktor KJU „Centar za socijalni rad“ Samir Suljagić, te rukovodilac Ureda za društvenu brigu Rijasetu IZ u BiH, Ibrahim-ef. Malanović.

Riječ je o drugom dijelu humanitarne akcije koja sadrži 1.000 prehrambenih paketa, a koji su namijenjeni socijalno ugroženim porodicama. U projekat je uloženo 100.000 KM.

Sastanak sa ambasadorom Crne Gore Obradom Mišom Stanišićem, Sarajevo, 9.6.2020.

Gradonačelnik Sarajeva Abdulah Skaka i ambasador Crne Gore Obrad Mišo Stanišić razgovarali su o saradnji Sarajeva sa crnogorskim gradovima i zajednički realiziranim aktivnostima. Razgovarano je o mogućnostima unapređenja saradnje Podgorice i Sarajeva, te o Festivalu RUTA (Regionalna unija teataru) gdje je ambasador iskazao zadovoljstvo učešćem Sarajeva u ovom regionalnom festivalu.

Ambasador je još jednom istakao potrebu za postavljanjem spomen obilježja Bošku i Admiru u Sarajevu, kao simbolu neuništive ljubavi.

Podrška Ambasade SR Njemačke u suzbijanju pandemije, donacija Sigurnoj kući, 9.6.2020.

Kao odgovor na pandemiju COVID-19, Ambasada Njemačke u BiH podržala je Sigurnu kuću u Sarajevu sa 9.000 eura, koje je uručila ambasadorica Margret Uebber 9.6.2020.

Zahvaljujući podršci njemačke ambasade, do sada nekoristene prostorije u Sigurnoj kući će biti osposobljene, čime će biti uvećani prihvatni kapaciteti. Pored toga, donacija uključuje opremu poput posuđa, odjeće, opreme za bebe, aparate i pokućstvo.

Njemačka ambasada u Sarajevu je kao reakciju na pandemiju COVID-19 dosad pružila podršku u iznosu od 39.000 eura. Njemački ministar vanjskih poslova Heiko Maas je najavio da će dodatnih 10 miliona eura biti stavljeno na raspolaganje za zapadni Balkan.

Oproštajna posjeta ambasadorice Republike Indonezije Amelie Achmad Yani, Sarajevo, 18.6.2020.

Povodom završetka četvorogodišnjeg diplomatskog angažmana ambasadorice Republike Indonezije u BiH Amelie Achmad Yani, gradonačelnik Sarajeva Abdulah Skaka primio je ambasadoricu u oproštajnu posjetu u Vijećnici 18.6.2020. godine. Tom prilikom, gradonačelnik se zahvalio i čestitao ambasadorici na uspješnoj misiji u Sarajevu i BiH.

Tokom svog mandata, ambasadorica je uradila mnogo na jačanju prijateljskih, ekonomskih, turističkih, kulturnih veza, a značajan iskorak je napravljen kad je riječ o međuuniverzitetškoj razmjeni studenata i profesora BiH i Indonezije.

Gradonačelnik je rekao da su prijateljski odnosi sa Indonezijom tradicija koju će Sarajevo i dalje njegovati. Iskazao je poštovanje prema svemu onome što je Vlada sa Ambasadom Indonezije učinila za BiH i Sarajevo, te istakao želju za jačanjem partnerskih veza između naših glavnih gradova Sarajeva i Džakarte.

Ambasadorica Yani je kazala da će po povratku u Indoneziju i dalje raditi na promociji prirodnih resursa i vrijednosti Sarajeva i BiH, te se posebno angažovati na uspostavljanju konkretne saradnje između dviju prijestolnica. Dodala je da namjerava napisati knjigu o BiH, koja će biti njeno šesto autorsko djelo.

„Sporazum o saradnji na projektu biciklističke staze Sarajevo-Pale“, Sarajevo, 8.7.2020.

U prostorijama Delegacije EU u BiH, dana 8.7.2020. godine potpisan je Sporazum o saradnji na projektu nove biciklističke staze Sarajevo - Pale, između Grada Sarajeva, Općina Stari grad, Istočni Stari grad i Pale. Domaćin potpisivanja ovog Sporazuma i inicijator projekta je bio šef Delegacije EU u BiH i specijalni predstavnik EU ambasador Johann Sattler.

Sporazum o saradnji su potpisali gradonačelnik Sarajeva, načelnik Opštine Pale, načelnik Opštine Istočni Stari grad i predstavnik Opštine Stari grad koji su ovom prilikom istakli zadovoljstvo zbog mogućnosti zajedničke saradnje i rada na povezivanju ovih gradova. Sporazum će omogućiti izradu studije izvodljivosti za izgradnju biciklističke staze Sarajevo – Pale, koja će značajno doprinijeti unapređenju turističke ponude i uvezivanju ovih lokalnih zajednica.

Evropska unija kontinuirano podržava razvoj turizma i unapređenje turističke ponude BiH. Budući da je turistički sektor jedan od najpogođenijih pandemijom COVID-19, Evropska unija je kroz projekat EU4Business izdvojila 1.6 miliona eura bespovratnih sredstava za očuvanje radnih mjesta i unapređenje turističke ponude u BiH.

Oproštajna posjeta ambasadora IR Iran Mahmouda Heidarija, Sarajevo, 29.7.2020.

Gradonačelnik Abdulah Skaka primio je 29.7.2020. godine u oproštajnu posjetu ambasadora IR Iran Mahmouda Heidarija, kojem je zahvalio na dobroj i uspješnoj saradnji i značajnom doprinosu u razvoju bilateralnih odnosa. Također je zahvalio Vladi i narodu IR Iran i ambasadoru lično za pomoć, podršku i angažman koji su do sada pružili Sarajevu i BiH.

Heidari je izrazio zadovoljstvo što je imao priliku da boravi u Sarajevu i realizira brojne projekte koji su, prije svega, imali za cilj upoznavanje naroda BiH sa prebogatom iranskom historijom, običajima, kulturom i umjetnošću. Istakao je da je u toku svoje misije svjedočio dobroj saradnji između naše dvije zemlje, pri čemu je Grad Sarajevo imao značajnu ulogu, a gradonačelnik je ukazao čast posjetom Teheranu. Također, zahvalio je Gradu Sarajevu na podršci narodu i Vladi Irana u borbi protiv pandemije COVID-19, osvjetljenjem Vijećnice u bojama zastave ove prijateljske zemlje.

Sagovornici su se složili da između naroda BiH i IR Iran postoje mnoge kulturno-historijske veze i sličnosti, te da između dvije zemlje nema otvorenih pitanja, a da su uspostavljanjem pobratimskih odnosa između Sarajeva i Teherana, te veze postale još jače. Također, obostrano je izraženo uvjerenje da će se prijateljstvo nastaviti razvijati u dobrom duhu u različitim segmentima, posebno u oblasti kulture, turizma, urbanizma i zaštite okoliša, te privrede.

Ambasador je pozvao gradonačelnika Sarajeva da, kada to prilike budu dozvoljavale, posjeti Grad Teheran, a gradonačelnik je poželio ambasadoru mnogo sreće i uspjeha u daljoj diplomatskoj karijeri.

Nastupna posjeta ambasadora IR Iran Gholamreza Alimohammad Ghelichkhana, Sarajevo, 20.10.2020.

Gradonačelnik Abdulah Skaka primio je 20.10.2020. godine u nastupnu posjetu ambasadora IR Iran Gholamreza Alimohammad Ghelichkhana, te mu poželio uspješan mandat u BiH.

Oba sagovornika su iskazala zadovoljstvo dosadašnjim izuzetno dobrim i prijateljskim odnosima između naše dvije zemlje, te želju za unaprjeđenjem istih. Zahvalivši IR Iran na pomoći i podršci BiH, gradonačelnik je izrazio uvjerenje da će ambasador Ghelichkhan svojim bogatim diplomatskim iskustvom doprinijeti unaprjeđenju saradnje i nastavku dobrih odnosa između naše dvije zemlje, te između Sarajeva i Teherana koji od 2016. godine imaju uspostavljene pobratimske odnose.

Ambasador Ghelichkhan je prenio pozdrave gradonačelnika Teherana Pirouza Hanachija, a gosp. Skaka je zamolio ambasadora da gradonačelniku Teherana prenese poziv da posjeti glavni grad BiH čim mu to budu dozvoljavale njegove obaveze i epidemiološke okolnosti.

Na sastanku je razgovarano i o aktuelnoj situaciji u Iranu izazvanoj pandemijom koronavirusa, pri čemu je iranski ambasador zahvalio Gradu Sarajevu na podršci osvjetljenjem Vijećnice u jeku pandemije.

Nastupna posjeta otpravnika poslova u Ambasadi Države Libije, Al Motasem Bellah Dhawija, Sarajevo, 20.10.2020.

Gradonačelnik Abdulah Skaka primio je 20.10.2020. godine u nastupnu posjetu otpravnika poslova u Ambasadi Države Libije Al Motasem Bellah Dhawija, te mu poželio uspješan mandat u BiH. Gradonačelnik je podsjetio na dobre i prijateljske odnose između Libije i bivše Jugoslavije, te na pobratimske odnose između Grada Tripolija i Grada Sarajeva, uspostavljene 1976. godine.

Sagovornici su izrazili želju da se saradnja između dva grada unaprijedi, naročito u oblasti privrede. Gradonačelnik je zamolio g. Dhawija da gradonačelniku Tripolija prenese poziv da posjeti Sarajevo naredne godine, kada bi se povodom 45. godišnjice pobratimskih odnosa ratificirao sporazum o saradnji između naša dva grada.

Tokom sastanka, g. Dhawi je govorio o aktuelnoj političkoj situaciji u Libiji kao i o mjerama koje ta država poduzima u borbi za sprječavanje širenja pandemije COVID-19.

Gradonačelnik Skaka je predložio da se u cilju pomirenja suprotstavljenih strana i uspostavljanja političkog rješenja i dijaloga u Sarajevu održi mirovna konferencija koja bi rezultirala sarajevskim mirovnim sporazumom.

V. OSTALE AKTIVNOSTI NA PLANU MEĐUNARODNE SARADNJE

Performans Gansu Dance Troupe u povodu Kineske Nove godine, Sarajevo, 11.1.2020.

Na poziv Ambasade NR Kine, performansu Gansu Dance Troupe, koji je u povodu Kineske Nove godine održan u Narodnom pozorištu Sarajevo 11.1.2020. godine, u ime gradonačelnika Sarajeva prisustvovala je pomoćnica gradonačelnika za lokalnu samoupravu i razvoj grada Dragana Solaković.

Sastanak sa predstavnicima Švicarske kompanije KEK-CDC, Sarajevo, 22.1.2020.

Povodom rada na projektu „Projekat urbane transformacije Sarajeva – Urban Transformation Project”, predstavnici švicarske firme KEK-CDC Dieter Zürcher i Marina Häusermann, i firme ENOVA iz Sarajeva Sanda Midžić Kurtagić, sastali su se sa predstavnicima Službe za urbano planiranje Grada Sarajeva, Arijanom Musić i Semirom Mušinovićem, kako bi ponudili rješenja ili eventualnu pomoć Gradu Sarajevu prilikom realizacije projekta.

Projekti koji su u fokusu pažnje, a na kojima Grad Sarajevo trenutno radi iz oblasti urbanizma su Gradski centar Marijin Dvor - lokalitet Kvadrant B i Centar Novo Sarajevo (lokalitet Vaso Miskin Crni).

Sa tim u vezi, Zürcher je predstavio ideje koje bi mogle pomoći prilikom realizacije, a koje pokrivaju eventualne potrebe/nedostatke s aspekta razvoja kapaciteta institucija. Pomoć Švicarske vlade bi se ogledala u organizaciji i razvoju vještina stručnjaka iz ove oblasti u Sarajevu, kao umrežavanje i saradnju sa studentima u Švicarskoj koji bi mogli doprinijeti pri izgradnji pilot projekata u Sarajevu.

Predstavnici Grada Sarajeva su prezentirali urbanističke i druge projekte na kojima se radi, kao i projekte koji su dio Smart City projekta.

Komemoracija povodom smrti Juan Maria Tintorea, Sarajevo, 7.2.2020.

Komemoracija povodom smrti počasnog građanina Grada Sarajeva, počasnog predsjednika Kraljevskog teniskog kluba RCT Barcelona 1899 - Juan Maria Tintorea, održana je 7.2.2020. godine na sceni Kamernog teatra 55 u prisustvu delegacije Grada Sarajeva, Kantona Sarajevo, teniskog kluba „Tenis Pro 1996“ Sarajevo, Teniskog Saveza BiH, Kamernog teatra 55, novinara i njegovih poštovalaca.

U svom obraćanju zamjenik gradonačelnika Ivica Šarić izjavio je da je Tintore svojim uticajem promovirao grad Sarajevo na najvišem međunarodnom nivou. Prigodno obraćanje o velikom humanisti – utiscima o Sarajevu i susretima sa Tintoreom, imali su i njegovi prijatelji i saradnici, a video pozivom iz Barcelone kratko se obratio i sin pokojnog Juan Maria Tintorea koji je poručio da je njegov otac bio izuzetno ponosan na Sarajevo i prijatelje koje je tu stekao.

Komemoracija je simbolično održana istovremeno u Sarajevu i Barceloni.

Prijem predstavnika kompanije Canon Medical Systems Europe, Sarajevo, 21.2.2020.

Gradonačelnik Sarajeva Abdulah Skaka primio je predstavnike kompanije Canon Medical Systems Europe (CMSE) u Vijećnici 21.2.2020. godine.

Predstavnici kompanije upoznali su gradonačelnika sa sastankom održanim sa menadžmentom Kliničkog centra Univerziteta u Sarajevu (KCUS) na kojem su predložili da se u cilju dodatnog razvoja poslovnog ambijenta KCUS proglasi referentnim CMSE centrom za jugoistočnu Evropu.

Canon Medical Systems je vodeći proizvođač krupne medicinske opreme, izuzetne sofisticiranosti. Ova kompanija je jedan od svjetskih lidera u proizvodnji medicinske opreme u oblastima radiologije, interventne onkologije i ultrazvučne dijagnostike, koju KCUS sada posjeduje i na kojoj postiže izvrsne rezultate rada u smislu dijagnostike i terapije.

Izložba u okviru EU projekta prekogranične saradnje „Muzejske priče“, Sarajevo, 6.3.2020.

Zajedničku izložbu „Žene u umjetnosti“ koja je realizirana u okviru EU projekta prekogranične saradnje BiH – Srbija „Muzejske priče“, otvorio je zamjenik gradonačelnika Milan Trivić u Vijećnici 6.3.2020. godine.

Projekat je realizirao Grad Sarajevo u partnerstvu sa Historijskim muzejom BiH, Centrom za kulturu „Vuk Karadžić“ iz Loznice i Zavodom za zaštitu spomenika kulture iz Kraljeva. Ukupna vrijednost projekta je 459.981,23 eura od čega je EU sufinansirala 390.110,08 eura, a preostalih 69.871,18 eura obezbijedili su partneri na projektu.

U okviru izložbe koja je bila postavljena do 27.3.2020. godine, prezentirana su djela savremenih slika i fotografija iz svijeta žena autorica Snežane Nešković Simić, Snježane Vlatković, Katarine Grujović Brković, te legat Nadežde Vitorović.

Projekat „Muzejske priče“ realiziran je u okviru Instrumenta za pretpristupnu pomoć (IPA II)-Programa prekogranične saradnje Srbija – BiH 2014.-2020. Cilj projekta je jačanje kulturnog identiteta BiH i Srbije kroz podršku rada muzejima prekograničnog područja kao čuvara historijskog i kulturnog naslijeđa i tradicije, u smislu povećanja njihove vidljivosti, unapređenja kapaciteta, poboljšanja međusobne saradnje i jačanja pozicije na tržištu kulturnog turizma.

Aktivnosti projekta će doprinijeti jačanju kapaciteta 11 muzeja prekograničnog područja: 6 u BiH (Historijski muzej BiH, Olimpijski muzej BiH, Zemaljski muzej BiH, Muzej književnosti i pozorišne umjetnosti BiH, Muzej Vijećnica, Muzej „Valter brani Sarajevo“) i 5 muzeja/institucija u Srbiji (Centar za kulturu „Vuk Karadžić“ Loznica, Zavod za zaštitu spomenika kulture Kraljevo, Narodni muzej Užice, Zavičajni muzej Priboj, Muzej Prijepolje).

Sarajevska Vijećnica u bojama zastave IR Iran, 20.3.2020.

U znak podrške vladi i narodu IR Iran u borbi protiv COVID-19, sarajevska Vijećnica je 20.3.2020. godine osvjetljena bojama iranske zastave. Naime, u Iranu je umrlo više od 1.400 osoba od posljedica zaraze koronavirusom, a zbog ove izuzetno teške situacije Iran je svrstan u red najteže pogođenih zemalja u svijetu.

Ova inicijativa koja je realizirana 20. marta na prvi dan iranske nove godine „Noruz“, manifestirala je duboke poveznice naroda dvije zemlje čiji je jedan od znakova i bratimljenje Teherana i Sarajeva.

Sarajevska Vijećnica u bojama zastave SAD-a, 13.4.2020.

U znak podrške u borbi protiv pandemije COVID-19, sarajevska Vijećnica je 13.4.2020. godine osvjetljena bojama zastave SAD-a sa porukom solidarnosti i podrške u ovim izazovnim vremenima „Stojimo uz vas, kao što se vi uvijek bili uz nas.“

SAD su jedna od prvih država koja je BiH poslala pomoć u medicinskoj i zaštitnoj opremi na početku širenja epidemije u našoj zemlji. Tokom decenijama dugog prijateljstva i savezništva dvije države, SAD su dale nemjerljiv doprinos u izgradnji i obnovi BiH i Sarajeva kao glavnog grada.

Poruka solidarnosti koju je Grad Sarajevo uputio američkom narodu i vladi u zajedničkoj borbi protiv pandemije koronavirusa, snažno je odjeknula u Washingtonu, ali i među brojnim bh. građanima u svijetu. Američki State department, odjel za politička i vojna pitanja, prenio je na svom Twitter profilu fotografiju i poruku gradonačelnika Sarajeva. Učinili su to i brojni prijatelji BiH u SAD i širom svijeta, naglašavajući snažne veze koje BiH ima sa SAD.

Posebno je bila značajna poruka američke ambasade u Sarajevu koja se na društvenim mrežama zahvalila na ovom činu podrške. Državni sekretar SAD-a a Mike Pompeo, objavio je na svom Twitter profilu fotografiju Vijećnice obasjane zastavom SAD-a, retweetajući pomenutu objavu američke ambasade.

Bratski grad Dayton je prepoznao važnost poruke pa ju je prenio i vijećnik iz ovog grada u američkoj državi Ohio - Mat Joseph koji je posebno zahvalio gradonačelniku Abdulahu Skaki.

Također, bh. zajednica u SAD je zabilježila ovaj događaj, pa je i najpoznatiji bh. košarkaš Jusuf Nurkić prenio fotografiju Vijećnice. Isto su učinile zajednice Bosanaca iz Sent Luisa i Bosansko-američko savjetodavno vijeće.

Sarajevska Vijećnica u bojama zastave Kraljevine Španije, 22.4.2020.

Sarajevska Vijećnica je 22.4.2020. godine ponovo bila simbol podrške, ovaj put građanima Kraljevine Španije, države koja je bila jedna od najvećih žarišta koronavirusa u Evropi.

Gradonačelnik Abdulah Skaka je istakao kako Španija i BiH imaju posebnu vezu, ali i kako su njihovo tradicionalno prijateljstvo i naklonost potvrđeni već ranije uspostavljanjem partnerskih odnosa Sarajeva sa Barcelonom i Madridom. Gradonačelnik je izrazio uvjerenje da će naši gradovi snagom duha, uz već dokazano zajedništvo i kapacitete kojima raspolažu, uspjeti prevazići situaciju izazvanu koronavirusom, te da će prijateljstvo postati još snažnije.

Sarajevska Vijećnica u bojama zastave Republike Turske, 23.4.2020.

Sarajevska Vijećnica je 23.4.2020. godine bila osvjetljena bojama zastave Republike Turske povodom obilježavanja vijeka postojanja Velike narodne skupštine Republike Turske koja obilježava 100 godina postojanja, te u znak zahvalnosti državi i narodu za pomoć i solidarnost u borbi protiv pandemije.

Grad Sarajevo na čelu s gradonačelnikom Abdulahom Skakom čestitao je jubilej predsjedniku Recepu Tayyipiu Erdoganu, predsjedniku skupštine Mustafi Sentopu i narodu Republike Turske, uz zahvalnost turskom narodu i vladi Republike Turske na nesebičnoj i velikoj pomoći BiH.

Naime, Republike Turska je početkom aprila 2020. godine poslala medicinsku pomoć BiH, Crnoj Gori, Srbiji, Sjevernoj Makedoniji i Kosovu u borbi protiv koronavirusa. Pomoć se sastojala od zaštitne opreme (medicinske maske i medicinska zaštitna odijela), te testova za COVID-19.

Gradonačelnik Skaka je poručio da će ovi izazovi sa kojima se suočavamo osnažiti naše prijateljstvo i produbiti saradnju koju intenzivno vode naše zemlje, kao i saradnju Grada Sarajeva sa bratskim gradovima Istanbulom, Ankarom, Bursom i Konyom.

Potpisana „Pariška deklaracija“, Sarajevo, 4.5.2020.

Grad Sarajevo je 4.5.2020. godine zvanično pristupio globalnom pokretu „Fast-track cities“ koji, od 2014. godine na temelju potpisane „Pariške deklaracije“, ulaže maksimalne napore u praćenju i ranom otkrivanju HIV-a i AIDS-a u svojim sredinama, te nastoje pomoći oboljelim sugrađanima u okvirima svojih mogućnosti.

Uključivanje Grada Sarajeva u ovaj projekat, u kojem djeluju mnogi svjetski i evropski centri poput Washingtona, Londona, Pariza, Berlina, Beča i još 500 većih i manjih gradova, rezultat je njegove saradnje sa nevladinom organizacijom Partnerstvo za zdravlje.

Tim povodom gradonačelnik Sarajeva Abdulah Skaka i izvršna direktorica Partnerstva za zdravlje Aida Kurtović potpisali su „Parišku deklaraciju“ kojom su se obavezali na određene aktivnosti s ciljem suzbijanja AIDS-a. Tom prilikom gradonačelnik je istakao važnost podizanja svijesti o ovom problemu, te potrebu intenziviranja aktivnosti na planu organizacije različitih edukativnih programa.

Sarajevska Vijećnica u bojama zastave Evropske unije, 9.5.2020.

Povodom Dana Evrope i Dana pobjede nad fašizmom, Vijećnica je 9.5.2020. godine bila osvjetljena bojama zastave Evropske unije, tako da su Grad Sarajevo i BiH u saradnji sa Delegacijom EU u BiH i Direkcijom za evropske integracije BiH poslali još jednu snažnu poruku zajedništva i solidarnosti.

Zbog pandemije COVID-19 izostao je koncert koji se ovim povodom prethodnih godina održavao u Vijećnici, poput koncerata u izvedbi Sarajevske i Zagrebačke filharmonije, Moskovskog kamernog orkestra Schnittke i Mađarskog nacionalnog filharmonijskog orkestra.

Sarajevska Vijećnica u bojama zastave Države Katar, 21.5.2020.

U znak zahvalnosti za pomoć BiH u borbi protiv COVID-19, sarajevska Vijećnica je 21.5.2020. godine bila osvjetljena bojama zastave Države Katar, koja je 19.5.2020. godine dopremila medicinsku opremu vrijednu oko šest miliona konvertibilnih maraka. Ovim činom Država Katar je pokazala svoje iskreno prijateljstvo prema BiH, s obzirom da se u datom trenutku nalazila u daleko težoj situaciji kada je pitanju pandemija koronavirusa.

Prijem Daniela Bronkala, direktora Caritasa Švicarske za BiH, Sarajevo, 10.6.2020.

Porodicama slabijeg imovnog stanja čiji je položaj dodatno otežan pandemijom COVID-19 u Sarajevu, podijeljena je interventna finansijska pomoć. Riječ je o novčanoj pomoći u vidu vaučera,

koje je obezbijedila organizacija Caritas Švicarske u BiH. Donacija je na tromjesečnom nivou i namijenjena je za kupovinu prehrambenih i higijenskih potreština.

Gradonačelnik Abdulah Skaka primio je 10.6.2020. direktora Caritasa Švicarske u BiH Daniela Bronkala i tom prilikom uručio mu zahvalnicu Grada, istakavši kako ovaj projekat predstavlja nastavak dobre saradnje Grada Sarajeva sa Caritasom i Vladom prijateljske Švicarske.

Inače, Caritas Švajcarske je uz podršku Vlade ove zemlje i privatnim donacijama, obezbijedio interventnu pomoć u vidu vaučera za oko 2.000 domaćinstava u općinama i gradovima BiH, odnosno za 6.000 lica, za april, maj i juni 2020. godine u svrhu prevazilaženja poteškoća izazvanih širenjem COVID-19.

Predstavljanje opusa „Exodus“ maestra Safeta Zeca, Srebrenica – Potočari, 7.7.2020.

Predstavljanje opusa „Exodus“ maestra Safeta Zeca, održano je u Memorijalnom centru Srebrenica - Potočari 7.7.2020. godine. Ovaj veliki kulturni događaj, kao sastavni dio programa obilježavanja 25 godina od genocida u Srebrenici, organizirao je Grad Sarajevo u saradnji sa Memorijalnim centrom Srebrenica - Potočari i Ateljeom Safet Zec.

Na poziv Grada Sarajeva i Memorijalnog centra Srebrenica - Potočari, događaju su prisustvovala brojne zvaničnice među kojima i predstavnici diplomatsko-konzularnih predstavništava, međunarodnih organizacija i specijalnih misija u BiH.

Slikarski opus „Exodus“, kao kruna umjetničkog stvaralaštva Safeta Zeca, postavljen je u BiH prvi put.

Sastanak Savjetodavnog odbora Sarajevo grad filma UNESCO-a, Sarajevo, 15.7.2020.

Konstituirajući (on line) sastanak Savjetodavnog odbora projekta Sarajevo grad filma UNESCO-a, čiji su članovi gradonačelnik Abdulah Skaka, ministar kulture i sporta Kantona Sarajevo Kenan Alikadić, šef Odjela za industriju Sarajevo Film Festivala Jovan Marjanović, predsjednica Udruženja filmskih radnika BiH Elma Tataragić, arhitekta i direktor Studija za projektovanje i inženjering Grupa.Arh d.o.o.i Sead Gološ, održan je 15.7.2020. godine.

Glavna tema sastanka je bio Akcioni plan 2020. - 2024., usvojen prilikom kandidature Sarajeva za prestižni status grada filma UNESCO-a u oktobru 2019. godine. Akcioni plan obuhvata lokalne i međunarodne inicijative čija realizacija podrazumijeva blisku saradnju svih nivoa vlasti u Sarajevu, odnosno povezivanje javnog, privatnog i civilnog sektora, u čemu će značajno pomoći stručni i kreativni doprinos članova Odbora.

Projekat Sarajevo grad filma UNESCO-a ima za cilj održivi razvoj grada i jačanje pozitivnog imidža Sarajeva kroz kreativnu oblast filma. Uspješno provođenje Akcionog plana ogledat će se u razvoju filmske i TV proizvodnje, širenju filmske kulture, te povećanju stručnosti, zaposlenosti i mobilnosti mladih talenata i profesionalaca u filmskoj industriji. Akcioni plan obuhvata i inicijative za poticanje aktivnosti i u drugim srodnim kreativnim industrijama u svrhu oživljavanja javnih prostora i unapređenja kulturne scene u Sarajevu.

U julu 2020. godine pokrenuta je nova web stranica koja povezuje svih 18 svjetskih gradova koji imaju status grada filma UNESCO-a unutar globalne Mreže kreativnih gradova UNESCO-a.

Zajednička stranica će doprinijeti ostvarivanju bliže međunarodne saradnje između gradova te bržeg i lakšeg upoznavanja sa aktivnostima i inicijativama iz svih gradova.

Sarajevska Vijećnica u bojama zastave Republike Austrije, 26.10.2020.

Povodom 26. oktobra – Nacionalnog dana Republike Austrije, osvjetljen je najreprezentativniji objekat Austro-ugarske na našem prostoru – Vijećnica. Ovo je bio još jedan pokazatelj dobrih bilateralnih odnosa BiH i Austrije, te Sarajeva i Beča koje veže tradicionalno prijateljstvo i uspješna saradnja.

Sarajevska Vijećnica u bojama zastave Republike Turske, 29.10.2020.

U okviru tradicionalnog prijateljstva između BiH i Republike Turske, sarajevska Vijećnica je osvjetljena bojama turske zastave povodom 29. oktobra – Nacionalnog dana Republike Turske.

Sarajevska Vijećnica u bojama zastave SAD-a, 8.11.2020.

Sa porukama Bosnia remembers! Unity over Division!, sarajevska Vijećnica je 8.11.2020. godine osvjetljena u čast istinskog i dokazanog prijatelja naše zemlje, novog predsjednika SAD Joe Bidena. Tom prilikom, gradonačelnik Skaka je čestitao i prvoj ženi potpredsjednici u američkoj historiji Kamala Harris, ali i Bosancu u Bidenovom pobjedničkom timu, Elviru Klempiću.

Okončan projekat „Sarajevo bez mina“, novembar 2020.

„Memorandum o razumijevanju“ između Grada Sarajeva i američke organizacije „Marshall Legacy Institute“ (MLI), kojim će se omogućiti potpuno deminiranje glavnog grada BiH do 2020., potpisali su gradonačelnik Abdulah Skaka i general Gordon Sullivan u Washingtonu 24.10.2018. godine.

Simbolično, 4. aprila 2019. godine, na *Međunarodni dan borbe protiv mina*, gradonačelnik Skaka i ambasador SAD u BiH Eric Nelson, ozvaničili su početak realizacije projekta „Sarajevo bez mina“. Projektom su bile obuhvaćene četiri općine koje su bile suočene sa problemom mina: Novi Grad, Stari Grad, Istočni Stari Grad i Vogošća.

U novembru 2020. godine u potpunosti su deminirane općine Stari Grad, Novi Grad i Istočni Stari Grad, a preostalo je još da se završe aktivnosti u općini Vogošća gdje deminerski timovi rade na zadnjim lokacijama Gora kamenica i brdo Žuč.

Ova inicijativa predvođena ITF Enhancing Human Security, Marshall Legacy Institutom, Centrom za obuku pasa za otkrivanje mina u BiH, a u partnerstvu sa Gradom Sarajevom, napravila je veliki korak naprijed u postizanju svog cilja, a to je učiniti BiH zemljom slobodnom od mina.

Svečana sjednica Gradskog vijeća - dodjela nagrada i priznanja u 2020. godini, 22.12.2020.

Svečana sjednica Gradskog vijeća Grada Sarajeva održana je u Vijećnici 22.12.2020. godine, u povodu dodjele nagrada i priznanja Grada Sarajeva u 2020. godini, čime se na simboličan način odaje poštovanje zaslužnim građanima i prijateljima Grada Sarajeva koji su svojim angažmanom učinili izuzetan doprinos njegovom ugledu i afirmaciji na regionalnom i internacionalnom planu.

Priznanje „Počasni građanin Grada Sarajeva“ je dodijeljeno bivšem Predsjedniku Republike Sjeverne Makedonije Branku Crvenkovskom, kao i bivšem visokom predstavniku u BiH i

nekadašnjem njemačkom ministru za poštu i telekomunikacije prof. dr. Christian Schwarz-Schillingu i Jure Franku, kojima će priznanje biti naknadno uručeno.

Priznanje „Plaketa Grada Sarajeva“ uručeno je prof. dr. Halilu Güneşu, za doprinos unaprjeđenju obrazovne i naučne saradnje sarajevskog i istambulskog Univerziteta kao i BiH i Republike Turske.

VI. AKTIVNOSTI GRADA SARAJEVA U OKVIRU MEĐUNARODNIH ASOCIJACIJA

Na osnovu člana 26. stav 1. tačka 2. i člana 87. Statuta Grada Sarajeva („Službene novine Kantona Sarajevo”, broj 34/08 – prečišćeni tekst) Grad Sarajevo može pristupiti međunarodnim udruženjima lokalnih zajednica i sarađivati sa odgovarajućim lokalnim jedinicama drugih država, u skladu sa zakonom.

Odluku o pristupanju udruženjima, odnosno ostvarivanju saradnje iz navedenog stava donosi Gradsko vijeće.

Grad Sarajevo je član dvanaest međunarodnih asocijacija/mreža, od čega obavezu plaćanja članarina ima prema osam asocijacija, u iznosu od cca. 30.000,00 KM godišnje:

1. Unija glavnih gradova Centralne i Jugoistočne Evrope (UCSEEC). Godina pristupanja: 2001. Asocijacija nije aktivna.
2. Mreža zdravih gradova Svjetske zdravstvene organizacije (WHO). Godina pristupanja: 2001. Godišnja članarina: 3.500,00 \$.
3. Mreža balkanskih gradova (Balcinet). Godina pristupanja: 2002. Mreža nije aktivna.
4. Evropska koalicija gradova protiv rasizma (ECCAR). Godina pristupanja: 2004.
5. Mreža „Gradonačelnici za mir“ (Mayors for Peace). Godina pristupanja: 2004. Godišnja članarina: 4.500,00 ¥.
6. Međunarodna asocijacija gradovi glasnici mira (IAPMC). Godina pristupanja: 2005. Godišnja članarina: 500,00 €.
7. Mreža evropskih gradova „Eurocities“. Godina pristupanja: 2005. Godišnja članarina: 4.390,00 €.
8. Svjetska unija olimpijskih gradova (UMVO). Godina pristupanja: 2009. Godišnja članarina: 5.000,00 €.
9. Liga historijskih gradova (LHC). Godina pristupanja: 2009. Godišnja članarina: 100,00 \$.
10. Evropski gradovi i regije za kulturu LIKE. Godina pristupanja: 2012. Godišnja članarina: 1.380,00 €.
11. Open & Agile Smart Cities. Godina pristupanja: 2015.
12. Mreža mediteranskih gradova „MedCities“. Godina pristupanja: 2016. Godišnja članarina: 1.000,00 €.

Grad Sarajevo je od 2009. član Strazburškog kluba koji ima za cilj oživjeti evropske vrijednosti demokratije, dijaloga između kultura i poštivanja ljudskih prava u lokalnim javnim politikama.

Aktivnosti koje su tokom 2020. godine realizirane u okviru međunarodnih asocijacija čiji je Grad Sarajevo član su sljedeće:

Konferencija Open & Agile Smart Cities (OASC), Brisel (Kraljevina Belgija), 21.-24.1.2020.

Šef Odsjeka za informatičke poslove Ammar Makić prisustvovao je Godišnjoj konferenciji pod nazivom „Connected Smart Cities & Communities” koja je u organizaciji Open & Agile Smart Cities (OASC) održana u Briselu. Ovom događaju prisustvovalo je oko 150 zvanica, među kojima i nekoliko gradonačelnika i predstavnika Evropske unije.

Makić je u ime Grada Sarajeva – člana OASC mreže, prisustvovao i radionici za članove, na kojoj su predstavljene aktivnosti mreže od prošlogodišnje konferencije, kao i planovi za tekuću godinu.

Nakon radionice, upriličena je „networking” večera, gdje su se predstavnici zemalja članica bliže upoznavali sa aktivnostima i iskustvima iz pojedinih regiona/gradova.

75. godišnjica od atomskog bombardovanja Hiroshime i Nagasakija, 20.7.2020.

Svjetska nevladina organizacija „Gradonačelnici za mir“, čiji je Grad Sarajevo član od 2004. godine, zbog nemogućnosti održavanja redovne konferencije povodom 75. godišnjice od atomskog bombardovanja Hiroshime i Nagasakija, izrazila je namjeru da pripremi videozapis za promicanje solidarnosti prema ostvarenju svijeta bez nuklearnog oružja.

„Gradonačelnici za mir“ su pozvali gradonačelnike Hiroshime i Nagasakija, gradonačelnike izvršnih gradova među kojima je i Sarajevo, osobe koje su preživjele napad atomskom bombom, te predstavnike nacionalnih vlada i nevladinih organizacija, da pošalju kratku video poruku na temu „Nema više Hirošime! Nema više Nagasakija!”

Poruka podrške koju je u ime Grada Sarajeva snimio zamjenik gradonačelnika Milan Trivić, bila je sastavni dio videa koji su „Gradonačelnici za mir” objavili 20.7.2020. godine.

Online Generalna skupština Svjetske unije olimpijskih gradova (UMVO), 28.10.2020.

Generalna skupština Svjetske unije olimpijskih gradova (UMVO), čije je sjedište u Lausannei (Švicarska), održana je online 28.10.2020. godine, a u ime Grada Sarajeva učestvovao je zamjenik gradonačelnika Milan Trivić.

Na prethodnoj Generalnoj skupštini Unije, održanoj u Tokiju u novembru 2019. godine, gradonačelnik Skaka je predložio da Grad Sarajevo bude domaćin naredne Generalne skupštine, te je zatražio aktivno članstvo Grada Sarajeva u Izvršnom odboru.

Na ovogodišnjoj skupštini Grad Sarajevo je izabran za člana Izvršnog odbora Unije. U Izvršni odbor koji ima 15 članova izabran je i London, a izbor je bio jednoglasan. Zbog trenutne situacije sa koronavirusom detalji o održavanju Generalne skupštine 2021. godine nisu precizirani.

Grad Sarajevo je aktivan član Svjetske unije olimpijskih gradova od 21.10.2009. godine i od tada gotovo redovno sudjeluje u radu godišnjih sastanaka i seminara. Među glavnim ciljevima Unije su razmjena iskustava i znanja između gradova i organizatora olimpijskih igara.

Generalna konferencija Evropske koalicije gradova protiv rasizma (ECCAR), 19.11.2020.

Evropska koalicija gradova protiv rasizma (ECCAR) i Grad Bologna organizirali su online Generalnu konferenciju pod nazivom „CommunicAtion – Zajedno za zaštitu ljudskih prava na lokalnom nivou“, koja je održana 19. i 20.11.2020. godine

Konferencija je okupila evropske institucije, međunarodne organizacije, aktiviste, gradove i njihove mreže, medije i mlade generacije – sa ciljem promocije jačanja kulture ljudskih prava i isticanja uloge lokalnih vlasti u polju obrazovanja, mladih i komunikacija u oblikovanju inkluzivnih gradova.

Prvi dan Konferencije zatvoren je Okruglim stolom gradonačelnika na temu „Djelovati izvan EU zakona: uloga lokalnih vlasti na polju obrazovanja, mladih i komunikacije u cilju oblikovanja inkluzivnih gradova“.

U radu Okruglog stola učešće je uzeo zamjenik gradonačelnika Milan Trivić, a među ostalim sagovornicima bili su gradonačelnici Bologne i San Lazzara, zamjenik gradonačelnika Torina, dok su se gradonačelnici Portlanda (Oregon-SAD) i Torina javili video porukom.

Inače, Evropska koalicija gradova protiv rasizma (ECCAR) je inicijativa pokrenuta od strane UNESCO-a 2004. godine, a ciljevi su borba protiv rasizma, diskriminacije i ksenofobije u gradovima, promoviranje jednakosti stanovnika gradova bez obzira na rasu, boju, naslijeđe, etničko porijeklo i osiguravanje slobode, jednakosti, prava i dostojanstva za sve, integracija Akcionog plana Koalicije u općinske i gradske strategije i politike.

Grad Sarajevo učestvuje u njenom radu od 2002. godine, a pristupio joj je 10.12.2004. godine.

16. Generalna skupština Mreže mediteranskih gradova „MedCities“, 3.12.2020.

Mreža mediteranskih gradova „MedCities“ održala je 16. Generalnu skupštinu u online formatu na kojoj se govorilo o aktivnostima, finansijskom izvještaju, budžetu, akcijskom planu za 2021. godinu, strateškom planu MedCities 2030. kao i o prijemu novih članova. U ime Grada Sarajeva učestvovao je zamjenik gradonačelnika Milan Trivić.

Mreža mediteranskih gradova „MedCities“ osnovana je u Barceloni u novembru 1991. kao platforma za razmjenu iskustava između gradova sjeverne i južne obale Mediterana, te kao instrument za jačanje lokalnih vlasti po pitanjima održivog rasta i razvoja. Do sada je njenim članom postalo više od 50 gradova sa područja Mediterana, a Grad Sarajevo se pridružio „MedCities-u“ 2016. godine.

Osnovni cilj asocijacije je promoviranje izrade strategije održivog rasta i razvoja gradova, te provođenje određenih gradskih projekata i promoviranje rasta uloge lokalnih vlasti. Aktivnosti MedCities-a se realiziraju kroz projekte koje finansira EU i drugi internacionalni fondovi, a sastoje se u davanju tehničke pomoći i podrške, organizaciji studijskih putovanja i seminara, i održavanju političkog dijaloga.

Gradovi mreže kreiraju svoje strateške planove putem projekata. Kategorije projekata su: urbano planiranje, mobilnost i prijevoz, održivost i okoliš, zapošljavanje i ekonomski razvoj, turizam i kultura, nove tehnologije i socijalna kohezija.

X. OCJENA STANJA

Fokusirajući se na razvojnu komponentu, Grad Sarajevo je značajno doprinio afirmaciji glavnog grada Bosne i Hercegovine kao političkog, privrednog, kulturnog, sportskog i turističkog centra regije i Evrope uopće.

U izvještajnom periodu međunarodna saradnja Grada Sarajeva je u skladu sa okolnostima izazvanim pandemijom COVID-19, bila usmjerena ka održavanju i unaprjeđenju postojeće saradnje s gradovima, asocijacijama ili institucijama, te uspostavljanju saradnje s novim inostranim partnerima u oblasti primjene smart city rješenja, kulture, obrazovanja, sporta, zaštite i očuvanja kulturno-historijskog naslijeđa, turizma i privrede, energetske efikasnosti, te ostalim područjima djelovanja u okviru nadležnosti gradskih uprava.

Kao rezultat provođenja ciljeva međunarodne saradnje, u izvještajnom periodu ostvareni su, pored promocije Sarajeva, i konkretni benefiti ili je u toku realizacija konkretnih aktivnosti.

XI. PROGRAMSKA ORIJENTACIJA

U današnjem svijetu u kojem međunarodni dijalog i saradnja dobivaju na značaju, odnosi između gradova i prekogranična saradnja uspostavljena kao rezultat međunarodnih dijaloga, igraju centralnu ulogu u vanjskopolitičkim strategijama lokalnih samouprava.

Programska orijentacija u oblasti međunarodne saradnje zasnovana je na intenziviranju i konkretizaciji veza s prijateljskim gradovima, posebno glavnim gradovima regiona, kroz zajedničke projekte u oblasti unaprjeđenja lokalne uprave, edukacije kadrova, kulture, energetike i turizma. Poticanje novih i daljnje unaprjeđenje i obnavljanje već uspostavljenih kontakata s pobratimskim, prijateljskim i partnerskim gradovima s ciljem razmjene informacija i iskustava na područjima djelovanja u okviru nadležnosti gradskih uprava, kao što su lokalna samouprava, kultura, obrazovanje, sport, turizam, pitanja mladih, zdravstvo i socijalna politika, gradske javne službe, zaštita i očuvanje kulturno-historijskog naslijeđa, zaštita okoline, strategija razvoja malih i srednjih preduzeća, međunarodni odnosi i druga područja od međusobnog interesa, te saradnja na nivou gradskih vijeća.

XII. ZAKLJUČNA RAZMATRANJA

Kao rezultat provođenja ciljeva međunarodne saradnje, pored promocije Sarajeva, u izvještajnom periodu ostvareni su i konkretni benefiti ili je u toku realizacija konkretnih aktivnosti, te su višestruko veći od sredstava koja su realizirana u provođenju aktivnosti međunarodne saradnje grada Sarajeva za 2020. godinu.

Ocjenjujući međunarodnu saradnju Grada Sarajeva tokom 2020. godine uspješnom u smislu unaprjeđenja postojećih veza i uspostavljanja novih partnerskih odnosa, te realiziranih projekata, ovoj oblasti treba i dalje pristupati s posebnom pažnjom, te je izuzetno važno ohrabriti bilateralne i multilateralne projekte sa drugim gradovima i međunarodnim institucijama.

Evropski trend regionalizacije i decentralizacije nameće ozbiljan pristup i posebno uvažavanje značaja diplomacije gradova, kao svojevrsne efikasne forme međunarodnih odnosa čiji je nosilac grad. Gradovi putem svojih višestrukih odnosa koji često nadilaze institucionalne forme saradnje, doprinose rješavanju zajedničkih problema, stvarajući tako trajne strukture, odnosno internacionalni dijalog, ne samo u okviru regije, nego i šire.